

## Universitätsbibliothek Paderborn

**Christophori Ranzovii Equitis Holsati Epistola Ad  
Georgivm Calixtvm Professorem Helmstedensem Qua sui  
ad Ecclesiam Catholicam acceßus rationes exponit**

**Rantzaу, Christoph**

**Romae, 1651**

**urn:nbn:de:hbz:466:1-12805**



1. Panegyricus de Institutione Collegij  
Germanici et Vngarici. pag. 1.
2. Le Reuolutioni di Napoli accadute  
dal Signor Alessandro Giretti. pag 63.
3. Guillielmi Becari e Societate IESV  
Idyllia et Elegia. —“—“ 172
4. Christophori Ranrouij Epistola ad  
Georgium Calixtum. —“—“ 234
5. Henrici Valesij Oratio in Obitum  
Jacobi Simondi. —“—“ 273
6. Leonis Altalij Melissolyza de laudib⁹  
Dionysij Petavij —“—“ 289

X. VII. 19.

M. 5811.



2

3

4

5

6

Legato Elmi Princeps Ferdinandi  
Epi Paderb. et Monaster.  
Anno 1653.

GE

F

234

CHRISTOPHORI  
RANZOVI

EQUITIS HOLSATI

EPISTOLA

AD GEORGIVM CALIXTVM

PROFESSOREM HELMSTEDENSEM

*Qua sui ad Ecclesiam Catholicam  
accessus rationes exponit.*



ROMAE ANNO MDCLI

Typis heredum Ludouici Grignani  
excludit Gregorius Tiberius.

SUPERIORVM PERMISSV.

485

ΙΩΝΟΤΕΡΗ

ΙΑΝΟΣ ΙΑΙ

Ιωνοτερη

CL. DOCTISSIMOQUE VIRO  
**GEORGIO CALIXTO**  
**CHRISTOPHORVS RANZOVIUS**

*Sal. plur. dicit, vouetque æternam.*

**L**ITERAS tuas a. d. vi. Maij  
 datas, doctissime idemque  
 optime Calixte, plane quales  
 sperabam accepi, neimpe mo-  
 destiae & humanitatis, tum  
 vero officiosi erga me affectus plenas. In-  
 dicant illæ, itidem ut alia sub idem tem-  
 pus ex patria perlatæ, quam solliciti meæ  
 de re fuerint homines sui omnium incu-  
 riosissimi: quicum nihil Romæ spectatu di-  
 gnum putent præter publicorum operum  
 moles, & prisci splendoris indices parie-  
 tinas; nec nisi cum stabularijs, lanistis, &  
 saltatoribus plerique versentur, me viros  
 piis doctosque frequentantem, quibus  
 hæc vrbs abundat, in fidei catholice ve-  
 ritatem inquirere ægrefuerunt. Sed illi de-  
 se viderint: ego quidem pro eo quo teneor  
 æternæ felicitatis desiderio, studij humani  
 curiositatem nusquam melius exerceri cre-  
 do, quam in negotio salutis; quæ extra

A

*Epistola*

vnam veramque Christi ecclesiam sperari  
nullo modo potest. Proinde cum hæc præ-  
cipua Italicae profectionis caussa mihi fue-  
rit, sedulo hic disquirendum mihi existi-  
maui de religionis capitibus, quæ septen-  
trionem infelici schismate separant à Ro-  
mana cæteraque catholica ecclesia. Eam-  
que ad rem peropportuna mihi accidit  
amicitia Lucæ Holstenij, sacerdotis catho-  
lici ex Transalbiana nostra; viri & erudi-  
tione & humanitate singulari, & in SS. Pa-  
trum & Conciliorum lectione versatissimi.  
In eo præcipue me delectauit, quod ab  
omni sophistica futilitate & logomachia  
abhorreat; quippe qua veritatem Catho-  
licam luce meridiana clariorem, obfusca-  
ri tantum tenebrisque inuolui existimat.  
Eius consilio in discernendis fidei contro-  
uersijs regulam Vincentij Lirinensis, quem  
tua commendatione nosse & amare cæper-  
am, adhibui; scilicet, diuinæ legis auto-  
ritatem, & Ecclesiæ catholicæ traditio-  
nem: itaut verum & indubitatum crede-  
reñ quicquid sacra scriptura docet, dum  
modo interpretationis eius linea secun-  
dum ecclesiastici & catholici sensus nor-  
mam dirigatur; non iuxta peculiarem cu-  
juscunque demum veteris aut nouæ sectæ  
opinionem detorqueatur.

Huius regulæ ductu dubitare non potui,  
quin ea certissima sacræ scripturæ mens es-  
set, & vera ac genuina ecclesiæ catholicæ  
doctrina, quam proxime ab Apostolis ac-  
ceptam probatissimi primorum quinque  
sæculorum Patres, & quatuor Concilia  
generalia, quatuor euangelijs antiquorum  
iudicio comparanda, tradiderunt: tum  
etiam quod suppare*s* ijsdem temporibus  
historię ecclesiasticę auctores scripto nobis  
consignatum vnanimi consensu relique-  
runt: nec aliunde primitiū Ecclesiæ sen-  
sum clarius certiusque erui posse existima-  
ui. Ita vt, quæcumque primis istis sæculis  
in dogmatibus fidei, ecclesiæ sacramen-  
tis, eorumque usu & ritibus; tum etiam in  
politia & disciplina publica, ubique, sem-  
per, & ab omnibus credita, probata, &  
usitata fuisse certo sciām, ea pro veris, &  
catholicis dogmatibus, sacramentis, ri-  
tibus, legibusque ecclesiasticis amplectar  
& teneam. E contra eos, qui vel olim pu-  
blicam istam vniuersitatem ecclesiæ doctrinam  
peruicaciter negarunt, adulterarunt, im-  
pugnarunt; vel hoc tempore, veterum  
quorundam exemplo, negant aut impu-  
gnant, ideoque Ecclesiæ communionem  
deserunt, hæreticos, schismaticos, noua-  
tores, & Ecclesiæ perturbatores fuisse.

A 2

## 4

*Epistola*

atque etiam nunc esse pronunciare non  
verear.

Quocirca primum ac præcipuum huius  
disquisitionis caput esse duxi, vt in ipsius  
Ecclesiæ nomen, naturam, & notas sue  
attributa sedulo inquirerem; quæ secun-  
dum Apostolum, domus Dei est, columna  
& firmamentum veritatis: & iuxta fidei  
symbolum, vna, sancta, Catholica, & Apo-  
stolica credi debet. Principio enim nisi  
vna sit, Ecclesia esse nequaquam potest.  
Cum enim corpus sit Christi capitum sui;  
vnius autem capitum non nisi corpus vnum  
esse possit, vnam tantum, quacumque dif-  
funditur, Ecclesiam esse necesse est. Ea au-  
tem vnitatem vnius eiusdemque fidei verita-  
te, eorundem sacramentorum communio-  
ne, pacis denique & concordia communis  
vinculo continetur. Ideoque ubi fides  
diuersa est, & sacramenta non eadem ce-  
lebrantur, neque coniuncta vnius frater-  
nitatis in vna Dei domo cohabitatio, ibi  
Ecclesia vna non est. Vnde iam olim hac  
re de pronuntiavit Cyprianus: Deus vnu-  
s est, & Christus vnu, & vna Ecclesia  
eius, & fides vna, & plebs in solidam cor-  
poris vnitatem concordia glutino copula-  
ta. Scindi vnitatem non potest: nec corpus  
vnum dissidio compaginis separari, diuul-

sis laceratione visceribus in frusta discerpi.  
Quicquid enim à matrice discesserit, seorsim viuere & spirare non poterit, substantiam salutis amittit. Ex quo sequitur Catholicam ecclesiam, quæ præcipua à parte Romana dicitur, cum Lutherana, Calviniana, vel Anabaptistica vnam eandemque ecclesiam nec esse, nec fingi posse. Cum istæ non solum ab ea discrepent multis fidei capitibus, diuersisque sacramentis; sed hostili quoque odio dissideant. Omnes enim istæ sectæ à Romana ecclesiæ eam ob causam superiori sæculo se disiungerunt, quod non Ecclesiam Dei, sed satanæ regnum, & Antichristi sedem, atque ipfissimam Babylonem eam existimarent; ideoque Luthero classicum canente, omnibus salutem in Christo sperantibus, & animo & corpore fugiendam crederent. Neque hactenus suscepimus semel odium posuerunt. cum hoc ipso tempore Ecclesiæ hostes rerum potiti, templa Catholicorum inuadant, bonis spolient, episcopatus suppressant, monasteria subuentant, suæque sectæ doctrinam Catholicæ fidei abrogatæ substituant.

Sanctam quoque credimus & profitemur Ecclesiam, quam Christus ipse, teste Apostolo, sanguine suo sanctificauit, mundans eam

Iauacro aquæ in verbo , vt exhiberet ipsam  
sibi glorirosam , non habentem maculam  
aut rugam, aut aliquid huiusmodi, sed vt sit  
sancta & immaculata. Quod cum Augustino  
retr. l. i. c. 18. & alibi, ita intelligimus, non  
quasi iam sit, sed quæ preparatur vt sit, quan-  
do apparebit etiam gioriosa. Sancta tamen  
quam Spiritus sanctus Christi Domini, vt  
cum Tertulliano loquar , vicarius nun-  
quam deseruit , nunquam deseret; sed vir-  
tutum vberitate fecundat , & sanctitatis  
magistram populo Dei constituit. Sane cum  
singulari Dei instinctu animus meus inde à  
puero ad veram pietatem anhelaret , &  
pauca à nostris scripta reperirem igni illi  
cælesti fouendo opportuna , quo diuini  
amoris incendium exardeceret; oblatis  
mihi tunc catholicorum scriptorum me-  
ditationibus sacris, cœpistatim persenti-  
scere , quanto sauius vberiusque Eccle-  
siæ illius filij de matris suæ vberibus Spi-  
ritus dulcedinem , & pietatis nutrimen-  
tum sugerent , quam qui externæ nutricis  
exsuccas & arentes mammæ inani labore  
fatigant. Eoque prima mihi de Ecclesiæ  
illius statu cognoscendo suborta est cogi-  
tatio . neque enim verisimile videbatur in  
ea arbore fidei medullam exaruisse , quæ  
tam vberes pietatis fructus gigneret.

Atque istam tunc coniecturam minime  
me se felliſſe abunde deinceps Catholico-  
rum hominum vſu & conuerſatione ex-  
pertus sum; maxime cum ad urbem acces-  
ſiſsem. Nam vbi tu ſuperſtitionibus, nu-  
gis, & nouitatibus me offenſum iri existi-  
masti, ibi insperato planeque admirando  
ſpectaculo vniuersa Catholicæ Ecclesiæ  
facies antiquæ pietatis ſanctitatisque  
plena, oculis animoque meo ſe ſe aperuit,  
in ipſo Iubilei, quod INNOCENTIVS XI.  
Pont. Max. orbi Christiano indixerat,  
principio. Vidi enim ſolemni ſupplica-  
tionis ritu ad Basilicam Vaticanam  
procedentes numerosiſſimas infantium  
ſcholas, agmina monachorum, & religio-  
forum hominum ſodalitia; inde collegia  
diuersa clericorum, & Eccleſiarum presby-  
teria. Clerum ſuum ſequebatur Pontifex,  
veneranda Epifcoporum corona circumfu-  
ſus. Hunc populi Christiani ducem, & an-  
tistitem supremum immenſa fidelium tur-  
ba ſubſequebatur, eo animi ardore, ut cæ-  
lum ipsum expugnaturi, manuque violen-  
ta direpturi viderentur, homines pleri-  
que omnes facco tantum & cilicio teſti,  
& ſcipione viatorio armati. Vbi in porti-  
cum ad limen Ecclesiæ peruentum, Pon-  
tifex in genua proquolutus, cum oratione fu-

per plebem data misericordiam diuinam  
implorasset; occlusas valvas non tam ape-  
riens, quam diruens, primus templum  
ingreditur, rectaque pergit ad altare.  
preces solemnes inchoaturus. Interim non  
sine stupore spectaui, quo impetu populus  
illeingens in Ecclesiam irrueret, limina  
certatim exosculantes, genibusque perre-  
ptantes: templum ingressi pars in terram  
proni, totoque prostrati corpore, pars B.  
Petri, ut vocant, Confessioni, & altaribus  
prouoluti, lacrimas precessque funderent;  
& ad misericordiam Dei extorquendam  
non tam pectus palmis, quam celum ipsum  
inuidia tunderent. Hæc fateor noua tum  
visa mihi, cui nihil simile apud nostros an-  
tea obseruatum; vbi homines ad orationē  
genusflexi non nisi in sepulcrorum memo-  
rijs pieti sculptiue conspiciuntur. Sed noui-  
tas illa clarissimum antiquę sanctitatis indi-  
cium mihi præbuit: vnde Ecclesiam etiam  
nunc vitali vigore Spiritus sancti vegetari  
regique certo perspicerem. Eaque in sen-  
tentia magis confirmatus sum, vbi popu-  
lum illum agmine immenso, & continua  
serie cæteras Ecclesias, precibus stationi-  
busq; præstitutas, obeuntem vidi; suppli-  
cationibus interim, & litanij suo quosque  
ordine, sed uno coniunctoque pietatis cer-

camine diuinam opem expoentes . Tum  
vero perspexi , quanta pietatis æmulatione  
peregrini ad Vrbem confluentes & publi-  
cis Ecclesiæ , & suæ quique nationis priuatis  
hospitijs excipientur : ad hæc quo studio  
curaque soueantur ægroti , quod fidem  
propemodum omnem excedit .

In tanto populorum & nationum nume-  
ro facile perspexi , quid Catholica eccle-  
sia a sectis factionibusque priuatis distet :  
cum hic omnes gentes omnesque linguæ  
vnius fidei & caritatis vinculo socientur ;  
apud istos vnius eiusdemque ciuitatis po-  
pulus , sæpe etiam familiæ singulæ , opinio-  
num & parietum diuertigio separatae , suo  
quique in angulo Ecclesiam coarctatam  
existiment , cæterosque ut extorres ac  
profanos ferali odio auersentur .

Christus Dominus omnes gentes , &  
extremos terræ terminos hereditatem  
& possessionem à Patre accepit . patrimo-  
nium hoc amplissimum integrum , nec mi-  
nuendum vñquam , tabulis dotalibus san-  
guine suo obsignatis sponsæ vnicæ contulit .  
Proinde mirandum , cum S. Augustino , qua-  
lem vesaniam patientur hæretici , qui pre-  
cisi à compagine Ecclesiæ Christi , & par-  
tem tenentes , & totum amittentes , nolunt  
communicare orbi terrarum , quo diffusa .

est gloria Christi; cui comunicat catholica Ecclesia. Etenim Christianorum cum sint hæreses plures, atque omnes se catholicos velint videri, aliosque præter se hæreticos nominent; vna est Ecclesia catholica, cui hæreses aliæ diuersa nomina imponunt, cum ipsæ singulæ proprijs vocabulis, quæ negare non audeant, appellantur. Huius igitur Ecclesiæ tenenda est nobis communicatio, quæ Catholica est, & Catholica nominatur, non solum à suis, sed etiam ab omnibus inimicis. Velint enim nolint ipsi quoque hæretici & schismatum alumni, quando non cum suis, sed cum extraneis loquuntur, catholicam nihil aliud quam catholicam vocant. Non enim possunt intelligi, nisi hoc eam nomine discernant, quo ab vniuerso orbe nuncupatur. Hæc sola Ecclesia nos Deo seruat, hæc filios regno, quos generauit assignat. quisquis ab ea segregatus adulteræ iungitur, à promissis Ecclesiæ separatur. Eius unitatem, qui non tenet, Dei legem non tenet; non tenet Patris & Filij fidem, vitam non tenet & salutem. Quocirca, inquit, si tibi angelus de cælo diceret: Dimitte Christianitatem orbis terræ, & tene partes Donati, (hoc est Lutheri vel Caluini), anathema esse deberet: quia te à toto præcidere, & in partem con-

trudere conaretur , & alienare à promissis  
Dei. Ecclesia sponsa Christi est , vt ait idem  
Augustinus , totum possidet quod à viro  
suo accepit in dote . Quæcunque congrega-  
tio cuiuslibet hæresis in angulo sedet ,  
concubina est , non matrona . iactet se cum  
spuria prole contra Ecclesiam , & ancilla  
procax dominæ conuitia & iniurias inge-  
rat ; ejcietur tamen cum filijs suis , qui ut-  
eunque nunc Christi patrimonium sibi ar-  
rogent , hæredes cum filijs liberæ num-  
quam erunt . Neque enim Deum patrem  
habere potest , qui non habet matrem Ec-  
clesiam .

Et ne quis hanc matrem fidelium , arcam  
salutis , & Christi tabernaculum ignorare  
posset , in sole illud posuit , deditque in-  
lucem gentium : atque vt Dei ciuitas con-  
spicua appareret omnibus , in montis ver-  
tice eam eminere voluit . Quomodo enim  
gentes in tenebris & vmbra mortis seden-  
tes ad eam conuerterentur , si veritatis li-  
uce extinta errorum nox ipsam oppressisset ;  
vel admota Diogenis laterna in angulis es-  
set quærenda ? Ecclesiarum origines euol-  
luenti omnium sæculorum exempla occur-  
runt , quam fidei & religionis matricem  
& magistrum singulæ agnoscant . Taceo  
Britanniam , quatenus Angli Saxonesque

noſtri eam occuparant , S. Gregorij magni apostolatu per Augustinum sociosque monachos Euangelij luce perfusam . Cogita Saxoniam nostram Cismarinam cum prouincijs vicinis ad intimum septentrimonem porrectis , & extremam Thulen , S. Anscharij prædicatione Catholicæ ecclesiæ adiectam . Cogita reliquam transrhenanam Germaniam , quæ extra veteris Romani imperij limitem fuit , Bonifatij , VVillebrordi , Suiberti , & VVilhadi , aliorumque sanctissimorum hominum labore , & industria ad catholicæ fidei agnitionē , & Ecclesiæ vniuersalis communionem perductam . Nunquid ea tunc inuisibilis latebat Ecclesia , quæ Apostolicos viros prædicationis munere legitime instructos eo misit ? quæ recens fundatis ecclesijs Episcopos ordinavit ? quæ ritus legesque ecclesiasticas , omnemq; disciplinam sacram ijsdem tradidit ? Si recentiora tempora spectemus , miraculo euidenti non caruit , quod auorum memoria de America , de vltima Africæ ora , & de Indiæ remotissimis prouincijs insulisque factum scimus . Subtraxerat Ecclesiæ catholicæ veritatis hostis prouincias & regna , quæ ad Septentrionem vergunt , & vniuersalis Ecclesiæ membra non ita pridem nobilissima in partes seatasque va-

rias disperserat; ita ut Christi patrimonium non exigua parte mutilatum videri poterat: cum repente veritatis sol, cui peruersum & obstinatum animum homines factiosi occluserant, prouicijs quas dixi remotissimis, & dira barbarie effera-tis exoritur, suoque lumine longe lateque omnia perfundit: ubi nunc regna, & prouinciae propemodum infinita Christi iugo colla submiserunt; & religio catholica per metropoles, episcopatus, academias celeberrimas, & religiosorum hominum collegia infinita, latissima propagine diffusa floret. Quis vero nescit, quibus auspicijs, qua auctoritate, quorum opera & ministerio id factum? Neque enim ex latebris noui & incogniti prædicatores emerserunt, quod auorum memoria apud nos contigisse scimus; sed Pontificum, regumque Catholicorum studio agmina operariorum ad nouam messem, ex Catholicæ ecclesiæ gremio fuere submissa. Neque nunc obscurum ulli est, unde missionarij ad fidei Catholicæ reliquias inter haereticos & schismaticos tuendas, vel veritatem de integro apud infideles propagandam submittantur, qui omnium nationum collegia, non solum Romæ, sed per cæteras omnes orbis prouincias, etiam in Iaponia, sub primo solis or-

tu à Pontificibus Romanis fundata non ignorat. Hoc catholicæ Ecclesiæ studium, hanc Pontificum, hanc Cardinalium curam vel præcipuam hic esse sciunr, qui sine odio & inuidia res Romanas inspiciunt. Neque eam inanem esse nostro hoc tempore patitur Deus, quum non ita pridem certo nuntio ex Oriente perlatum sit, Sinarum Regem cum familia & nobilitate præcipua, Christi fidem suscepisse, principumque exemplo myriades hominum passim ad baptisum properare: ita ut competentibus catechizandis vix omnes per Europam sacerdotes, si eo mitterentur, sufficiunt videantur.

Denique Apostolicam eandem Ecclesiam symboli definitione profitemur, eo quod originem, & successionem ab Apostolis continua serie deductam usque in finem seruet. Constat enim, inquit Tertullianus, quod Christus Iesus dominus noster duodecim Apostolos, quos haec appellatio missos interpretatur, lateri suo adlegerit, destinatos nationibus magistros, ad Patrem regrediens iussit ire, & docere nationes tingendas in Patrem, & Filium, & Spiritum sanctum. Tum etiam quod Apostoli consecuti promissam virtutem Spiritus sancti ad virtutes & eloquium, primo per Iudeam

contestata fide in Iesum Christum, & ecclesijs institutis, dehinc in orbem profecti, eandem doctrinam eiusdem fidei nationibus promulgauerunt; & proinde Ecclesiæ apud vnamquamque ciuitatem condiderunt: e quibus traduces fidei, & semina doctrinæ cæteræ exinde Ecclesiæ mutuatæ sunt, & quotidie mutuantur, vt Ecclesiæ fiant, ac per hoc & ipsæ Apostolicæ deputantur, vt soboles Apostolicarum Ecclesiarum. Omne enim genus ad originem suam censeatur necesse est. Itaque tot accentæ Ecclesiæ vna est illa ab Apostolis prima, ex quâ omnes; & sic omnes primæ, & omnes Apostolicæ, dum vnam omnes probant unitatem. Constat proinde omnem doctrinam, quæ cum illis ecclesijs Apostolicis, matricibus & originalibus fidei, conspirat, veritati deputandam; id sine dubio tenentem, quod Ecclesia ab Apostolis, Apostoli à Christo, Cristus à Deo suscepit. Reliquam vero omnem doctrinam de mendacio præiudicandam, quæ sapiat contra veritatem Ecclesiarum, & Apostolorum, & Christi, & Dei. Hec ille.

Vnde facile perspexi, Septentrionalem nostram Ecclesiam, quamdiu eam fidei doctrinam & ordinationem retinuit, quam S. Ansgario prædicante ab Apostolica se-

de suscepserat, vere Catholicam, vere Apostolicam fuisse; quippe ab Apostolico viro fundata, cui petente Ludouico Pio Gregorius V. Sedis apostolice præsul ante corpus & Confessionem S. Petri, publicam gentibus septentrionalibus euangelizandi auctoritatem tribuerat. Sed cum post annos paulo minus DCC eadem prouincia per Lutheri emissarios, quorum præcipuus apud nos fuit Ioannes Pomeranus, in partem se & amque peculiarem pertraherentur; & noui isti predicatores, veteri fide & disciplina partim abrogata, partim interpolata, Ecclesias cathedrasque Episcoporum, qui vel exilio vel carcere multati decesserunt, inuaderent; & homines à se ipsis orti, novo more, sine episcopali ordinatione collegas & successores sibi constituerent; dubium non est, quin Apostolice successionis serie interrupta eadem Ecclesia ex Catholica & Apostolica in hæreticam Lutheranam conuersa fuerit: ut etiam Cisalbiana vestra, quam à Suiberto & VVilhado Gregorij II. & Hadriani I. Apostolicorum Præsulum auctoritate fundatam, eadem pestis postea afflauit, & subuertit.

Dixi Ecclesias nostras Septentrionales Apostolice doctrine propaginem ex Roma-  
na

na accepisse, quam Apostolicam fuisse, atque etiam nunc esse, nemo vñquam sanus dubitauit: quinimo vt omnium apostolicarum maxima & antiquissima, honoris prærogatiuam præcipuam semper obtinuit. Eius potentiorem principalitatem statim post Apostolorum tempora agnouit Ireneus. Eam statu felicem pronunciat Tertullianus, cui totam doctrinam Apostoli cum sanguine profuderunt; atque inde Africanis quoque ecclesijs suam auctoritatem presto fuisse testatur; eo scilicet, quod doctrinam fidemque ex ea acceperit, ideoq; ut matrem & magistram coluerit vniuersa Africa. Hanc Petri cathedram atque ecclesiam principalem; hanc ecclesiæ Catholice radicem & matricem agnoscit Cyprianus. In ea semper apostolicæ cathedræ principatum viguisse affirmat Augustinus. Vnde vniuersa antiquitas hanc Sedē Apostolicam proprio & absoluto nomine semper appellauit, & Episcopo ipsius Domni Apostolici titulum peculiarem tribuit. Ex ea vnitas sacerdotalis exorta est, teste Cypriano: quia Christus, vt sanctus ille martyr loquitur, super vnum Petrum ædificat ecclesiam suam, & illi pascendas mandat oves suas; & vt vnitatem manifestaret, vnam cathedralm cōstituit, & vnitatis eius.

B

dem originem ab vno incipientem sua au-  
toritate disposuit . Et in pari consortio  
honoris & potestatis, præ ceteris Apostolis  
primatus Petro datur , vt vna Christi ec-  
clesia , & cathedra vna monstretur .

Ob hunc primatum, siue potentiorem  
principalitatem Romanæ sedis, necesse est  
ad eam omnem conuenire ecclesiam ; hoc  
est , eos qui sunt vndique fideles , vt iam  
olim pronuntiauit Irenæus : ita vt catholi-  
cus censeri nullo modo possit , qui eius ec-  
clesiæ communione non fruitur . Hanc Pe-  
tri vnitatem qui non tenet , inquit Cypria-  
nus , tenere se fidem credit ? qui catho-  
dram Petri, super quam est ecclesia funda-  
ta , deserit , in ecclesia se esse confidit ? Nec  
quenquam latere potest historię ecclesi-  
sticę paulo peritiorem , quam solicite olim  
Orientalium ecclesiarum episcopi de statu  
suo periclitantes , Romanæ sedi fidem suam  
probare studuerint , eiusque exambierint  
communionem ; vt ecclesiæ , vel saluas  
retinerent , vel amissas recuperarent . Hanc  
primam sedem ob eundem primatum nul-  
lius inferioris iudicio obnoxiam ceteræ  
omnes iudicem supremam in causis eccl-  
esiasticis agnouerunt . ad eam à conciliorum  
vel collegarum sententijs prouocarunt ;  
iniurijs pulsati eius poposcerunt auxilium ,

quod Petrus & Athanasius Alexandrinæ ,  
Meletius & Paulus Antiochenæ , Paulus &  
Ioannes Chrysostomus C Politanæ ecclesiæ  
Patriarchæ efficax & opportunum experti  
sunt . E contra Diocorum Alexandrinum  
ideo ab vniuerso Chalcedonensi concilio  
damnatum depositumque legimus , quod  
excommunicationis sententiam S. Leoni  
intentans , primam sedem iniuria con-  
tumeliaque affecisset . Hunc primatum  
Christianissimi quiq; Imperatores agnoue-  
runt . Ideoque Theodosius maior Nectarij  
Patriarchæ CPni electionem , quamuis ab  
vniuersali concilio Conſtpñō factam , à fe-  
de Romana confirmari voluit ; eique for-  
matam à Damaso PP. regulariter dirigi  
poposcit , vt testatur Bonifatius PP. I. Eo-  
dem modo iunior Theodosius cum Pro-  
clum ex Cyzicena ecclesia ad Conſtpnam  
transferri cuperet , prolatis Cœlestini PP.I.  
literis , quibus eam translationem pridem  
probarat , facile suo desiderio potitus est .

Sed cum tu nostro tempore Gr̄eos Ro-  
manæ sedis primatu iure offendì existimes ,  
mox Orientalis ecclesiæ mentem accuratius  
peruestigatam explicabo : vnum interim ad-  
dam ; supremam semper fuisse sedis Romanæ  
auctoritatem in conuocandis dirigendisq;  
episcoporum concilijs , quibus vel ip̄i Pon-

tifices per se, vel per legatos à latere missos  
vel per dięcesium primates , vicarios suos,  
pr̄sidebant . cuiusmodi Vicariatu per Il-  
lyricum Thessalonicensem, per Gallias Are-  
latensem , per Hispaniam Tarragonensem  
& Bracarensem olim fundatos fuisse, indubi-  
tate antiquitatis testimoñijs constat . Quali  
etiam postea per Germaniam Bonifatius  
Moguntinus , per septentrionem Anschäu-  
rius, eiusque aliquandiu successores ; per  
Angliam Cantuariensis , alibi alij ex vete-  
ri instituto ac priuilegio fungebantur. Nec  
minus absolute fuit Episcopi Romani in  
**Conciliorum** decretis vel confirmandis vel  
reprobandis au&oritas; quod Constpni. I,  
Ephesini , & Chalcedonensis generalium  
**conciliorum** synodice ad Damasum , Cale-  
stium, & Leonem magnū perspicue docent.  
Hæc qui in tanta sacræ eruditionis luce vel  
negare, vel sophismatum tenebris obfusca-  
re ausit , ei vel iudicium, vel pudorem om-  
nem deperisse dixerim . Quamuis tu Hil-  
debrandicis dictatis hæc accensere non  
verearis , & quasi noua fidei dogmata ad  
catholici nominis inuidiam exagites<sup>!</sup>. Sed  
cum hac etiam parte à R. P. Ebermanno in  
Moguntinis disputationibus satis tibi ner-  
uoſe responsum sciam , hoc interim Cato-  
ne contenti erimus.

Hec, quam exposui, rationum summa est,  
cur Romanam Ecclesiam pro Vna illa, San-  
cta, Catholica, & Apostolica agnouerim,  
quam fidei symbolo profitemur; & cur eius  
gremio atque communioni tuto me com-  
miserim. Vnde vice versa omnes extra  
eam congregaciones, quocunque demum  
reformationis nomine glorientur, aut qua-  
cunque puritatis specie sibi blandiantur,  
vt hæreticorum latibula detestor: eaque  
ut nullum nunc cum catholica ecclesia in  
terris militante, ita neq; in posterum cum  
triumphante in celorum regno partem ha-  
bitura certissime credo.

Verum enim uero illud vehementer mi-  
ror, quod cum hoc ad ecclesiam Catholi-  
cam accessu omnibus eius per vniuersum  
orbem membris me coniunxerim, tu con-  
tra ab iisdem me separatum existimes:  
eaque in re quam rationem sequaris, me  
non satis perspicere ingenue fateor. Nisi  
quod tu ecclesiam ex diuersis sectarum  
factionibus ita vnum in corpus conglu-  
tinatam existimas, vt quamuis omnes  
catholicæ e diametro aduersentur, in-  
ter se tamen occulto aliquo symbolo aut  
sympathia arcana, ipso scilicet catholicæ  
veritatis odio, ita sint colligatae, vt qui  
vnam negent, omnes negent. Sed cum pu-

rus putus Lutheranismus, tua quidem opinione, angustissimis limitibus contineatur, una scilicet & altera Saxonie nostrę prefectura, quotam quoq; ille orbis partem occupat, vt cum Catholicorum regionibus, Italia, Gallia, Hispania, Polonia, Germanię & Belgij parte maxima, tum vero cum America, India Orientali, & latiflimis Africę regnis, denique cum Gręcia, & Oriente, quarum maxima pars in catholica communione etiam hodie persistit, comparari queat?

Neque vero cum Lutheranismo caritatem & tolerantiam Christianam simul eiurauī, vt tu suspicari videris; eo quod cum sectę omnes mutuo se scabant ferantq; inuicem, soli catholici ceteros omnes diuersa sentientes anathemate defigant. Non ego Augustanam confessionem hic tibi opponam, vbi fere omnium articulorum epithonema est: Et damnamus secus sentientes: hoc dicam; cum nulla sit communicatio lucis cum tenebris, Christi cum Belial; cur veritatem catholicam amplexus haereticorum oppositionibus contra vniuersalia, hoc est, ab omnibus, semper, & vbique credita dogmata, anathema dicere verear? Paulus fidem Galatis semel traditam non alio munimento securam præstari posse existi-

mabat , quam ut aliter docentibus anathema intentaret ; idque non solum quibusque de vulgo preconibus , sed etiam Apostolis & Angelis ipsis . Ecclesia hortus ille est conclusus , ex Canticis , ad quem heresi aditus non patet . hec vinea euangelica , quam Dominus ab operarijs probe excultam , plantisque fructiferis confitam , ad fures ferasque siluestres arcendas sepe circumdedit . Et tu miraris , si maceriem illam fartam tectam conseruare omni ope studeat , si dirui perfodique prohibeat is , quem vineę suę Dominus suprema cum auctoritate preposuit ? Profecto ut erroris in se , ita iniquitatis in nos rei sunt , qui cum terminos a Patribus constitutos pro libitu mouere , limites confundere , fines exarare , siluam non suam cedere , in alienam messem falcem immittere , peruerso & pertinaci animo palam audeant ; vim sibi & iniuriam fieri queruntur , si alieno prohibeantur , si iuris violati postulentur .

Sed tu intra symboli articulos catholicae veritatis terminos stare existimas . que illo expresse definita non sunt , nullam certam credendi legem , sed promiscuam habere sentiendi licentiam ; que nouis ecclesiae definitionibus constringi coartarique non debeat . Sed minime nouum hoc aut insiq-

lens effugium. Nestorius cum temeratè veritatis catholicę accusaretur , fidei symbolum obtendebat , quod ~~Nestorius~~ vocem non agnosceret; illud se profiteri aiebat. Sed Cyrillus id satis esse negat. nam et si symbolum voce tenus profiteri videretur, non tamen recte illud ipsum intelligere , neque sincere, sed peruerse & prepostere interpretari . Ideoque necessum esse ut ea omnia scriptis execraretur, & anathematizaret , & publicè abiuraret , quę scelestę , & profane ha-  
ctenus ipse senserat , aliosque docuerat : cumque in finem duodecim anathematismos eidem prescribit , quibus errorem suum execraretur. Hisce anathematismis Cyrilli non solum Nestorius alias XII è diametro pugnantes opposuit; sed Ioannes Antiochenus cum asseclis eosdem ut heretica impietate refertos damnauit. Theodoreetus quoque & suo & Orientalium episcoporum nomine , contradictionibus totidem impugnauit. Stetit tamen immobilis catholica veritas , & Cyrilli anathematismos eidem stabiliende scriptos , vnuersa Dei Ecclesia approbauit, vtcunque principio noui durique multis viderentur.  
Hoc vnum namq; vt Vincentius Lirimensis iam olim dixit , omni industria semper studuit Ecclesia catholica, vt vetera fideliter

sapienterque, si qua sunt illa antiquitus informata & inchoata accuret & poliat; si qua iam expressa & enucleata, consolider & firmet; si qua iam confirmata & definita, custodiat. Imitatur enim animarum religio rationem corporum; quæ licet annorum processu numeros suos euoluant & explicent, eadem tamen quæ erant permanent. Easdem profectum leges Christianæ religionis doctrina sequitur, ut annis scilicet consolidetur, dilatetur tempore, sublimetur etate; incorrupta tamen illibata que permaneat. cum nihil propterea in dogmatibus permutationis admittat; nulla proprietatis dispendia, nullam sustineat definitionis varietatem. Fas est enim ut præsæ illa cœlestis philosophiæ dogmata processu temporis excurentur, limitentur, poliantur; sed nefas est ut commutentur, nefas ut detruncentur, ut mutilentur. Accipiant licet euidentiam, lucem, distinctionem; sed retineant necesse est plenitudinem, integritatem, proprietatem. Nullius ergo nouitatis insimulanda est Ecclesia, sedula & cauta depositorum apud se dogmatum custos, si subinde hereticorum nouitatibus excitata, conciliorum nouis strictioribusq; decretis veterem fidem asserere, & à corruptelis vindicare enixa fuerit, etiam sub-

anathematis denuntiatione . Quo illud  
tantum perfecit , ut quod antea simpliciter  
credebatur , postea crederetur diligen-  
tius : quod antea lentius prædicabatur ,  
hoc idem postea instantius prædicare-  
tur : & quod ipsa prius à maioribus sola  
traditione acceperat , hoc deinde posteris  
etiam per scripturæ chirographum consi-  
gnaret . Neque vero hereticorum hic cu-  
randa est oblocutio , neque eorum in gra-  
tiam vel apex vnuſ de rectis fidei decretis  
demendus vel mutandus . Nam si semel  
admissa fuerit hęc licentia , quis non videt ,  
quantum exscindendę atque abolendę re-  
ligionis periculum consequatur ? Abdic-  
ata enim qualibet parte catholici dog-  
matis , alię quoque atque item alię par-  
tes iam quasi ex more & lictō abdicabun-  
tur ; ita vt nihil posthac apud ecclesiam  
relinquatur intactum , nihil illibatum , ni-  
hil integrum . Hęc auctoris tibi notissimi  
fensiū verbisque paulo prolixius exposui ,  
quia plane ad rem nostram faciunt . Nol-  
les enim Lutheranis omnem pro libitu sen-  
tiendi licentiam strictis illis concilij Tri-  
dentini decretis ademptam , in multis fi-  
dei dogmatibus , quę cum eorum confes-  
sione vel hypotyposi non congruunt . Sed  
idem reliqui omnes sectarij conquerentur .

Omnibus ergo ex equo gratificandum erat?  
siccine vero sacrum illud fidei depositum  
integrum illæsumque posteris seruaretur?

Sane nullam maiorem Tridentinis pa-  
tribus curam fuisse scio, quam ut omnia  
ipsorum decreta ad primitiæ antiquitatis  
sententiam exactissime conformarentur.  
quod quamviste contra Veneti sannionis  
& Spalatensis apostatæ opinionem egre-  
rediturum sciam, crederes tamen, si Gu-  
lielmi Sirleti, tunc Vaticanæ bibliothecæ  
prefecti, epistolarum volumina mecum hic  
inspexisses; quibus ille singulis fere septi-  
manis ad Marcellum Ceruinum, Seripan-  
dum, aliosque concilij præsides Cardinales  
prolixè perscribebat, quæcumque de sin-  
gulis fidei capitibus ex SS. Patrum, præ-  
fertim Græcorum operibus, tunc maximam  
partem ineditis, diurno nocturnoque stu-  
dio colligere poterat: eaque opera præ-  
cipue purpuræ dignitatem meruit. Et sane  
præclara est, & in publicum proferri ope-  
ræ pretium foret: appareret enim omnibus  
perspicue, quam diuersos totoque cælo di-  
stantes polos spectarint Augustanæ confe-  
sionis Concordiæque auctores, atque ex-  
aduerso Tridentini patres autem fidei de-  
fensores. Nanque hic, solam cælestis veri-  
tatis cynosuram respiciens,

— semper sublimis ; at illum  
Sub pedibus nox atra videt , manesque pro-  
fundī .

Sane qui tuas aduersus catholicam fidem disputationes recte expendunt , eandem plane litem ecclesiarē te mouere facile perspiciunt , qua Pyrrhonij dogmaticos olim exercuerunt . Nam sceptici , ut acatelepsiam & epochen suam tuerentur , etiam certissima sapiētum decreta vocabant in dubium , adeoque omnia indefinita & incomprehensibilia pronutиabant . neque enim magis hoc , quam illud esse ; & omni rationi rationem æqualem opponi posse existimabant . Eodem modo cum sacra antiquitate agis . nulla tam clara & certa sunt SS. Patrum dogmata , nulla tam sancta conciliorum decreta , quæ non conuellantur ratiunculis , vel ex dubio aliquo , vel male intellecto , aut perperam explicato loco deductis . Ita nunc omnis veterum theologia mera tibi scēpsis est ; adeoque largiter peccasse putas ecclesiam , quæ accepta à Patribus dogmata , ab hereticorum peruiacia anathematis denuntiatione vindicanda censuerit ; in quibus scilicet leuia & exigui momenti permulta tibi videntur , quæ vtrum credas , aut non credas , vel quo pacto credas , parum intersit .

In his primo loco ponis Purgatorium,  
cuius non solum res, sed & nomen ipsum  
nostros homines vehementer offendit ; id-  
eoque non minores ob sublatum purgato-  
rium Lutherò gratias se debere existimant,  
quam Lucretius Epicuro suo,

— qui cum vita iaceret

In terris oppressa graui sub relligione,

Primum Graius homo mortales tollere contra  
Est oculos ausus , primisque obsistere contra .

Docuitque suos asseclas ,

Vt metus ille foras præceps Acherontis agendus  
Funditus , humanam qui vitam turbat ab imo .

Sed vtcunque illis explodendum videa-  
tur hoc dogma, certum est, antiquissimum  
& vniuersale semper fuisse in primitua  
ecclesia ; ideoque non sine ratione conci-  
lium anathemate id stabiliendum duxit :  
cum triplici ex capite veritas eius asseratur.  
Primo ex sacris literis, Matth. 5. vbi car-  
ceris nomine appellatur, in quo satisfiat  
vsque ad nouissimum quadrantem : tum  
prima ad Corinthios 3. vbi quosdam ita  
saluos futuros scribit Apostolus , quasi per  
ignem . Nititur deinde auctoritate præci-  
puorum doctorum ecclesiæ tam græcæ, quā  
latinæ , qui prædicta loca scripturæ vnani-  
mi consensu de purgatorio sunt inrepre-  
tati . In Græcis agmen ducunt S. Basilius ,

ad caput 9. Isaiae hac de re prolixè agens ;  
& libro de Spiritu sancto ad Amphilo-  
chium cap. 15. Gregorius Nazianzenus  
& Nyssenus in diuersis orationibus. Basilius Seleuc. orat. 4. de Dauide . Isidorus Pelus. lib. 5. epist. 350. & Ioannes Chrysostomus tom. 6. sermone pro defunctis, homil. 21. in Acta , & homil. 3. in epist. ad Philippenses: quæ loca Io. Matthæus Caryophilus Iconiensis antistes Zacchariæ Ger- gani græculi nugis erudite opponit . Cum doctoribus græcis paria faciunt latini . S. Ambrosius in locum Apostoli 1. Cor. 3. & Hieronymus in 4. caput Amos . Augustini autem loca omnia vel obiter indicare prolixum foret : cum neminem antiquorum plura, vel clariora hac de re scripsisse constet, ut unus instar omnium esse possit . Tertia ratio est analogia fidei , & sensus perpe- tuus vniuersæ ecclesiæ in precibus & obla- tionebus incruenti sacrificiij pro defunctis offerendis ; quod & ipse aliquoties te affir- mantem audiui . hæc autem vana & irrita essem, nisi animas tali in statu & loco com- morari credidisset antiquitas , ubi Ecclesiæ suffragijs subleuari possent . Tum etiam in veteris pœnitentiæ disciplina idem ecclæ- siæ sensus elucet , quæ vindictam peccati- ne ijs quidem , qui in extremo vitæ discri-

mine reconciliabantur , indulgendar cē-  
suit; sed sanitati restitutos Deo & fidelium  
societati pœnitentię squallore satisfacere  
voluit . Ab hac igitur perpetua vniuersæ  
antiquitatis sententia cur nunc demum  
ecclesia recedat ? vel hæreticorum proter-  
uiæ proculcandum relinquat dogma om-  
nium doctorum auctoritate stabilitum ?  
**Concilium** veritatem catholicam caute &  
prudenter decreto suo contra fideisubuer-  
sores asseruit ; simulque malas artes eorum  
qui ex pietate quæstum faciunt , & populi  
simplicitati illudunt , prescripsit : ita vt  
quid ab homine Christiano veritatis ac pie-  
tatis amante , tam in ipso dogmate , quam  
**Concilio** decreto desiderari possit , non vi-  
deam ; modo nouitatis & partium studio  
animus non præpediatur .

Eadem leuitate anathema infligi putas-  
ijs , qui septem Sacra menta non confiten-  
tur . Sed dic sodes , cur ecclesia catholica  
non damnet eos , qui duobus solis utcum-  
que retentis , cetera quinque vel expun-  
gunt , vel sacramentorum nomine indigna  
existimant ? Tunegare non potes , Latinos  
pariter & Græcos septenarium numerum  
agnouisse à quinque retro sæculis . Vnde  
autem hanc sententiam vtrique ecclesię  
subortam existimas eo tempore quo Græ-

corum schismia aduersus Latinos maxime  
feruebat? Quis eos nullas non dissidiorum  
causas auctupantes hac in parte Latinis tum  
coniunxit? Vnde hanc vtriusq; ecclesiæ ob-  
seruationem non nisi ex primitiua & apo-  
stolica traditione acceptam, & perpetuo  
vnu ad nostra usque ad tempora deriuatam  
esse necessario sequitur. Neque opus est,  
vt prolixius agam post eruditissimum lau-  
datissimumque opus Petri Arcudij Lutetiæ  
editum, quo consensus Græcæ ecclesiæ cum  
Latina tam solide ostenditur, vt nemo ha-  
etenus, quod sciam, contra hiscere ausus  
fuerit. Si ergo angelo de cælis nouum quid  
præter semel ab apostolis tradita prædi-  
canti, anathema intentet ipse Paulus; cur  
nostam profane in ecclesiæ sacramenta  
grassates anathemati subiçere dubitemus?  
Præcipua hæc diuinæ gratiæ instrumenta  
vniuersa Dei ecclesia semper agnouit, sem-  
per exercuit; & nunc demum post qua-  
tuordecim seculorū usum ea nouatoribus  
tollere & proculcare impune licebit? Nam  
vt firmissimum illum etiam nostro seculo  
vtriusque ecclesiæ consensum taceam, sane  
Confirmationis, Pœnitentiæ, Ordinis, ceteraque  
sacramenta tam perspicue & con-  
stanter proxima apostolorum temporibus  
ecclesia credidit & exercuit, vt nostro de-  
mum

mum seculo sine manifesto impietatis cri-  
mine abrogari , negari , & violari non po-  
tuerint . Mihi controversias post tot eru-  
ditos theologos retexere , animus non est:  
id breuiter ostendam , nullo modo me re-  
prehendendum, quod antiquitatis senten-  
tiām perpetuam nouis dogmatibus prætu-  
lerim .

Confirmationis sacramentum ab Apo-  
stolis traditum omnis antiquitas semper  
& vbiique tenuit: contra Nouatiani , id  
negantes & negligentes , omnium calcu-  
lo fine vlla controversia & exceptione , no-  
uatores & hæretici habiti . Quæro ego ,  
si tum receptissimum per omnem eccle-  
siam sacramentum fuit , cur nunc vt fig-  
mentum nullo veritatis fundamento ni-  
xum expungitur? Et si Nouatiani id explo-  
dentes olim omnium calculo fuerunt hæ-  
retici , quomodo Lutherus , Caluinus , cæ-  
terique sectarum patroni nunc eundem  
errorem errantes , ab hæresi immunes?  
Ad hæc , si olim ecclesia vniuersa Nouatia-  
nos iure damnauit ob violatum , aut ne-  
glectum hoc sacramentum , ideoque non  
nisi Chrismate confirmatos ad communio-  
nem eos recipi voluit ; cur hodie temera-  
riæ leuitatis notam meretur , si nouatores  
idem sacramentum exsibilantes anathe-

C

## 34 Epistola

mate defigat? Proinde miror qui nam tu contra Moguntinos §. 108. ferreæ frontis hominem pronunciare audeas, qui dixerit; siue ex scriptura, siue ex consensu antiquitatis demonstrari posse, sacramentum Confirmationis, quali nunc ecclesia Catholica vtitur, à Christo institutum esse. Ego vero non sine manifesta impietate in dubium vocari existimo, quin Apostoli, quod ipsi fecerunt, quodque vniuersæ ecclesiæ faciendum tradiderunt, à Christo magistro acceperint. Cum ergo vniuersa ecclesia inde à principio confirmationis sacramentum ab Apostolorum instituto se accepisse, & eorundem exemplo exercuisse fateatur; indubie sequitur, cōfirmationem illam à Christo per Apostolos institutam, non postea subintroductam fuisse. Ab ipsis autem Apostolis ecclesiæ traditum fuisse euidentissime patet. Etenim Clemens Alexandrinus libro, *Quis diues salvandus*, apud Eusebium hist. eccl. lib. 6. cap. 35. & ipse liber Clementis sub falso Origenis nomine non ita pridem à Gislerio editus, iuuenem quendam à Ioanne euangelista episcopo cuidam Asiatico commendatum commemorat; cui baptimate illuminato episcopus signaculum Domini, ut perfectam tutelam, contulit. Quo loco

baptismum & chrisma, vt diuersa sacra-  
menta à Clemente poni, ex simili loco  
stromatum lib. 2. certissimo apparet. Hinc  
Clementis discipulus Origenes ad Rom. 6.  
baptismum & chrisma conferri scribit, se-  
cundum typum ecclesiæ traditum: & Cor-  
nelius PP. apud Eusebium lib. 6. cap. 35. No-  
uatum, cum in morbo baptizatus esset, po-  
stea consecutum negat, cum cætera, quæ ba-  
ptismū sequuntur, κατὰ τὸν τῆς ἐκκλησίας κανόνα  
hoc est, iuxta ecclesiæ canonem, tum epi-  
scopalem obsignationem. Dic queso, à  
quo typum, vel canonem illum, seu regu-  
lam ecclesiæ traditam putas, nisi ab ip-  
sis Apostolis? Sane Cyprianus Carthagi-  
nensis Episcopus in Africa, eodem tempo-  
re ab apostolis dedit, quod baptizati ec-  
clesiarum præpositis confirmandi offere-  
bantur: vt per nostram, inquit, ordinatio-  
nem & manus impositionem, Spiritum san-  
ctum consequantur, & signaculo Domini  
consummentur. Cypriani mente & verbis  
loquitur Augustinus lib. 15. de Trinitate  
cap. 26. Nemo discipulorum dabat Spi-  
ritum sanctum; orabant quippe, vt in eos  
veniret, quibus manus imponebant; non  
ipsi eum dabant: quem morem in suis præ-  
positis etiam nunc seruat ecclesia. Nec  
minus perspicue S. Hieronymus dialogo

C 2

contra Luciferianum, cap. 4. Quod si hoc  
loco queris, inquit, quare in ecclesia ba-  
ptizatus, nisi per manus episcopi non acci-  
piat Spiritum sanctum? disce, hanc obser-  
uationem ex ea auctoritate descendere,  
quod post ascensum Domini, Spiritus san-  
ctus ad Apostolos descendit. Cui deinde  
locum ex Actorum cap. 8. subiungit: quo  
etiam Inocentius I. celebri illa epistola ad  
Decentium Eugubinum utitur, ut recens  
baptizatorum ob-signationem solis epi-  
scopis permisam doceat. Numquid tot  
talesque viri ferreæ tibi frontis viden-  
tur?

Sed quod tu frustra apostolicam illam &  
miraculosam manuum impositionem alle-  
gari existimas ad hodiernam, ut ais, Pon-  
tificiam confirmationem, eo non mi-  
nus iniurius es in secula primitua, & om-  
nes quos laudavi Ecclesiæ doctores, quam  
in hodiernam Romanam ecclesiam: cum  
iam illo tempore visibilis ista & miraculo-  
sa donorum effusio cessauerit. Ideoque  
vñus Agustinus reliquorum nomine tibi  
respondeat, tract. 6. in epist. S. Ioannis:  
Nunquid modo, quibus imponitur manus,  
vt accipient Spiritum sanctum, hoc expe-  
ctatur, vt linguis loquantur? aut quando  
imposuimus manum istis infantibus, at-

tendit vniusquisque vestrum, vtrum linguis loquantur? & cum videret eos linguis non loqui, ita peruerso corde aliquis vestrum fuit, vt diceret, non acceperunt Spiritum sanctum? Vides hanc peruersi cordis assertionem a S. Augustino iam olim explosam, cuius tempore miracula illa non minus, quam nunc cessarant. Neque tamen confirmationis sacramentum ideo de ecclesia tollendum censuit, quod nouatores postea fecerunt.

Eo autem rerum catholicarum plante imperitum ostendis, quod nullam prorsus manus impositionem in hodiernę confirmationis sacramento adhiberi affirmare non verearis. Ecclesia catholica nihil ab antiquo ritu mutauit. qualem S. Gregorij Magni sacramentorum libet iam olim descripsit, eundem Pontificale Romanum totidem verbis nunc retinet; scilicet, vbi confirmandi ad episcopum perduci coram eo in genua procumbunt, ibileuata manu sua super capita omnium dicit: Omnipotens sempiterne Deus, &c. emitte in eos septiformem Spiritum tuum sanctum, &c. Eandemque orationem Ambrosius lib. 3. de Sacramentis cap. 2. iam suo tempore in confirmatione adhiberi solet docet. Vnde manifestissime apparet,

C 3

quam tu frustra inter veterem, & hodie-  
nam confirmationem, tum etiam inter di-  
uersarum Ecclesiarum ritus discrimen fin-  
gas, quæ viris doctis in ecclesiastica anti-  
quitate probe versatis non nisi commis-  
erationem exprimunt.

Sed cum omnia persequi, neque huius  
loci, neque mei sit instituti, addo quod in  
hac quæstione præcipuum & palmatum est.  
Tu confirmationem meram cærementiam,  
eamque liberam & indifferentem, baptis-  
mo olim coniunctam fuisse affirmas. econ-  
tra veteres omnes sacramentum hoc à ba-  
ptismo diuersum existimant, & sacra-  
menti nomine passim appellant. Atque ita lon-  
go temporum decursu, usque perpetuo,  
à maioribus accepit, atque hodie etiam  
credit non solum Latina, sed & Græca ec-  
clesia. Tu, ubi commodum fuerit, tuæ op-  
inionis argumenta ex antiquitate propo-  
nes: ego interim pro mea, hoc est ca-  
tholica sententia, aliquot indubitata ve-  
terum testimonia afferam, quæ nullis offu-  
cijs offuscarri possunt. Tertullianus diabo-  
lum Christo etiam de sacramentis æmula-  
tum scribit, præscript. cap. 40. quo loco  
præter Baptismum, & Eucharistiam, Poenit-  
tētiā quoque & ob-signationem christina-  
tis; item ordinem, & matrimonium diser-

tissime sacramentorum Christi nomine ac numero comple&gitur; vt & lib. i. aduersus Marcionem, cap. 14. præcipue autem lib. i. aduers. Praxeam cap. 5. vunctionis sacramentum diserte appellat. Cum magistro sentit & loquitur Cyprianus epist. 72. vbi hereticorum rebaptismum propugnans ait, parum esse ijs manus imponi, ad accipiendo spiritum sanctum; sed tunc demum plene sanctificari, si sacramento utroque nascantur. Sic episcopi concilij Africani apud eundem Cyprianum epist. 70. constituunt, De errore & prauitate venientibus dandam per omnia diuinæ gratiæ sacramenta, unitatis & fidei veritatem. Quibus locis confirmationis sacramentum expresse non solum à baptismo distinguitur, sed eidem opponitur. S. Augustini loca multa & clarissima habentur de eodem sacramento chrismatis, ex quibus perspicue patet eum non cæremoniæ indifferentem, vt tu ais, sed verum & peculiare sacramentum confirmationem existimasse quæ libro secundo contra Petilianum, comment in psalm. 26. & tractatu in epistolam Ioannis 3. & 6. videri possunt. His duos addam antiquissimos grauissimosque scriptores, Cyrillum Hierosolymitanum, & S. Ambrosium. uterque ecclesiæ sacra-

menta initiandis necessaria explicans ,  
peculiari sermone de baptismo, & alio pe-  
culiari de spirituali signaculo, quo post fon-  
tem confertur perfectio , vt de diuersis  
Sacramentis agit : vt ex illius catechesi  
mystagogica. 2. & 3. huius sacramento-  
rum libro 3. apparet . Neque enim pura-  
puta cæremonia , & baptismi appendicula,  
vt tu vis , specialem catechesin mereba-  
tur.

Præterea si confirmationis sacramentum  
hæreticis ad ecclesiari reuersis Spiritus  
sancti gratiam confert , quam ex baptismo  
mere formali extra ecclesiam, quippe obi-  
cem diuinæ gratiæ ponentes, accipere non  
potuerant ; mera illa secundum te cære-  
monia efficacior erit , potiorque ad salu-  
em, ipso sacramento baptismi ; atque ita  
sacramenti defectus non validiori sacra-  
mento, sed nudæ cæremoniæ accessu emen-  
dabitur: quod quam sit absurdum, & quam  
omni doctrinæ & disciplinæ ecclesiasticæ  
contrarium, quis non videt ? Omitto Afri-  
canam, & Cappadociæ, vicinasque ecclesi-  
as; quæ, vt dixi, non solo confirmationis sa-  
cramento, verum iteratione baptismi prio-  
ris vitium corrigendum pertendebant:  
sed catholicam reliqui totius orbis sen-  
tentiam à concilijs Patribusque ex positam

propono. Cyprianus partem catholicam  
iūo argumento sic premit, epist. 76. Qui  
hæreticis siue schismaticis patrocinantur,  
respondeant nobis, habeantne Spiritum  
sanctum hæretici, an non habeant? Si ha-  
beant, cur illic baptizatis, quando ad nos  
veniunt, manus imponitur ad accipien-  
dum Spiritum sanctum? sed quia non ha-  
bent, ideo apud nos manus imponitur,  
ut hic accipient. Hinc can. 7. Laodicenus,  
Nouatianos eiurata hæresi catholicè in-  
structos sancto chrismate inungi, & sic ad  
ad sancti myst erij communionem admitti  
constituit. Sic Basilius magnus celebri illa  
epistola canonica ad Ampilochium, pro-  
bans Laodiceni concilij sententiam contra  
Cappadoces, de Nouatianis conuersis sta-  
tuendum ait, ut qui ab ipsorum baptismo  
accedunt ad ecclesiam, vngantur à fidelib-  
us. Eamque Laodicenæ Synodi, & Basili-  
ij sententiam confirmauit paulo post Con-  
cilium Costantinopolitanum 1. canonē 7.  
quo etiam ob signandi & vngendi formula  
Græcis hodie vſitatā præscribitur. Neque  
aliter canonem illum intellexerunt expli-  
caruntque Romanæ Ecclesiæ præsules con-  
cilio illi suppare. Siricius ad Himerium  
Tarrac. Arianos, inquit, nos cum Noua-  
tianis, alijsque hæreticis, sicut est in Syn-

odo constitutum, per invocationem scptiformis Spiritus episcopalis manus impositione, catholicorum conuentui sociamus; quod etiam totus oriens occidensque custodit. Similia habet Innocentius I. epist. 2. Sed omnium clarissime Leo Magnus loquitur epist. 85. Qui baptismum ab hæreticis acceperunt, sola invocatione Spiritus sancti per impositionem manuum confirmandi sunt; quia formam tantum baptisimi sine sanctificationis virtute sumpserunt. Hæc de confirmationis sacramento intelligenda quisdubit? quo etiam nun c ecclæsia catholica ab hæresi venientes veteri more suscipit. Veteri, inquam, more, idque non nisi per manum episcopi. Nam ut epilogus concilij Romani habet tom. 1. Conc. Colon. pagin. 255. iam ante dictos Pontifices Silvester Papa constituerat, ut presbyterum Arianum nemo susciperet, nisi episcopus eiusdem loci eum reconciliaret, & sacrosancto chrismate per episcopalis manus impositionem sancti Spiritus gratia, quæ ab hæreticis dari non potest, confirmaret. Concilio Romano accedunt Gallicana. Aræuficanæ Synodo can. 1. hæreticos in mortis discrimine positos, si catholici esse desiderant, si desit episcopus, a presbyteris cum chrismate & benedictio-

ne consignari placuit. Sic concilium Epao-  
nense can. 16. Presbyteros, inquit, propter  
salutem animarum desperatis & decum-  
bentibus hæreticis, si conuersationem subi-  
tam petant, chrismate permittimus sub-  
uenire; quod omnes conuersuri, si sani  
sunt, ab episcopo nouerint expetendum.  
Vides confirmationis sacramentum pres-  
byteris, tantum in articulo necessitatis,  
propter, salutem animarum ab episcopis  
olim permisum fuisse. Nam extra vrgen-  
tissimam necessitatem, per impositionem  
manus fidelibus baptizatis, vel conuer-  
sis ex hæresi, spiritum sanctum tradere epi-  
scopis tantum licet, ut habet concilium  
Hispal. 2. can. 7. Idemque supra Cypriani  
& Augustini testimonio probatum est. Et tu  
post apostolorum exempla, post vniuersa-  
lem totius primitiæ ecclesiæ doctrinam  
& praxin, sacramentum, quo illa animarum  
salutem conferri censuit, in cæremoniam  
arbitrariam & indifferentem, sine iusta  
ecclesiæ censura mutari posse existimas?

Hæc de Confirmatione sacramentorum  
numero asserenda paulo prolixius scripsi,  
ut videas quam bene ex antiquitate, sine  
ferreæ frontis aut plumbei cordis nota, se-  
tueatur catholica ecclesia, etiam vbi tu  
pessima causa eam niti existimas.

Multo igitur facilius reliquis sacramenti nomen vendicatur, quorum quædam ita sunt perspicua, ut ipsi lectæ vestre auctores in sacramentorum numero ea habuerint. Quod de pœnitentia fecisse constat Melanchthonem apologiæ confessionis Augustanæ cap. 13. & ipsum Luthèrum contra tr̄iginta duos Louaniensium articulos; tum vero catechismus minor, qui puerulis apud nos ediscendus proponitur, idem testatur: ubi inter articulum de baptismo & Eucharistia, caput de clauium potestate interiectum fuit. Si ergo pœnitentia vere est sacramentum, habens mandatum Dei & promissionem gratiæ, ut Apologia dicto loco ait, eandemque ob caussam Lutheruseam sacramentum libenter confitetur; peccant sane eius asseclæ, qui ecclesiam catholicam eo nomine sigillant, quod non confitentes anathemate feriat.

Matrimonium quoque tacito quodam consensu Lutherani in sacramentorum numero habent, dum perpetuo sacrum coniugij statum appellant. Et cur sacramentum post Paulum Apostolum credere & vocare dubitet Ecclesia? Sane omnium temporum Patres & Doctores frequentissime ita appellant, quod vnius Augustini locis fere innumeris ostendi potest;

præsertim ex libro de bono coniugali; ut  
Tertullianum lib. contra Marcionem c. 18.  
aliquoties sacramenti nomen matrimonio  
tribuentem, aliosque taceam.

De sacramento Ordinis sectarum auto-  
res Lutherus, Melanchthon, & Caluinus  
itidem discrepant. Ille enim cum secta-  
toribus Illyrico & Chemnitio, sacra-  
mentum esse inordicus negat; duo autem po-  
steriores in sacramentorum numero ha-  
bendum ostendunt. Ea scilicet vis est ca-  
tholicæ veritatis, ut aduersariorum oculos  
quamuis nititantes penetreret, suaque luce  
percellat. Nam ab ipsis Apostolis institu-  
tam, passimque visitatam, ut plurima sacre  
scripturæ loca testantur, vniuersa Dei ec-  
clesia suscepit, & pro vero atque indubi-  
tato sacramento semper habuit Ordinatio-  
nem, quæ fit per orationes, & manus im-  
positionem ab episcopis, quos in aposto-  
lorum locum successisse constat. Augusti-  
nus suo tempore neminem dubitasse affir-  
mat, quin Ordo æquè sacramentum esset  
atque baptismus, dum ait libro 2. contra  
Parmenianum cap. 19. Ipsi explicit, quo-  
modo sacramentum baptizati non possit  
amitti, & sacramentum ordinati possit amit-  
ti. Si enim vtrunque sacramentum est,  
quod nemo dubitat, cur illud non amitti-

ur , & illud amittitur ? neutri sacramento iniuria facienda est . Sol mero meridie clarior non est hoc Augustini testimonio , cui nullæ hæreticorum strophæ tenebras unquam offundent . Sic Leo magnus epist . 81. magna deuotione curandum monet , ne tantæ benedictionis sacramentum negligenter videatur impletum . Idem epist . 87. contra digamorum ordinationes inuehens ; Quis ergo , inquit , dissimilare audeat , quod in tanti sacramenti perpetratur iniuriam ? His accedit S. Hieronymus , Vigilantium eiusque asseclas exagitans his verbis : Nisi prægnantes clericorum viderint uxores , Christi sacramenta non tribuunt . hoc est , vt eadem epistola loquitur , Christi ministerio arbitrantur indignos . Vnde eum ordinationem sacramenti nomine intelligere dubium nullum est . Adderem S. Gregorij magni locum , omnium hac de re clarissimum , in 4. Regum cap . 5. nisi ille ob tenebras eius tempore ecclesiæ iam offundi cæptas , vt vos quidem dicitis , intestabilis vobis haberetur , qui vix primam & purissimam auditis antiquitatem . Certo credo me tam præclaris auctoribus nixum multo rectius Ordinis sacramentum cum catholica ecclesia admittere ; quam tu cum Lutherò eiusque asseclis , omnis antiquita-

tis hostibus , idem neges .

De extrema vñctione habemus Iacobi apostoli præceptum : habemus doctrinam & vsum perpetuūm veteris ecclesiæ; quam S. Anscharius Septentrionis apostolus, cum catholica fide nostris quoquè prouincijs intulit , vt ex eius vita Colonię nuper edita constat . Tu veniam dabis , si antiquitati fidem potius quam tibi tanta in re tribuam , & de sacramentorum numero ecclesię iudicium tuo præferam .

Tertio dicam impingis Ecclesiæ Romanæ , quod Ioannis & Christi baptisnum confundentes anathemate defigat . Sed quid peccauit Concilium Tridentinum , si fidei depositum fideliter custodit , & catholicum , hoc est , vetus & vniuersale omnium seculorum , omniunque Ecclesiæ doctorum dogma , disertissimis sacræ scripturæ verbis innixum , à nouatorum peruersione vindicat ? Quisquis Concilium e nomine fugillare non veretur , idem sibi dictum putet à S. Hieronymo , quod Luciferiano eundem errorem erranti iam olim respondit : Ita tu peruersè religiosus , dum serui baptismō plusquam habuit tribuis , dominicum destruis ; cui nihil amplius relinquis . Nec minus grauiter se ab Augustino , quam Petilianum , obiurgari ex .

istimet , vbi ait : Baptismus Ioannis ad ba-  
ptismum Christi non pertinet , nec eius  
pars vlla vel gradus est ; alioquin aut tunc  
iterabatur aqua baptismi Christi , aut si ba-  
ptismus Christi tunc per duas aquas per-  
ciebatur , minus perfectus est modo , quia  
non datur illa , quæ per Ioannem dabatur .  
quodlibet autem horum impium ac sacri-  
legum est opinari . Quid igitur cum uni-  
uersa Dei Ecclesia damnare formidem-  
eiusmodi dogma , quod ad impiam & sacri-  
legam opinionem viam sternit ? Nec igno-  
ro quam operose alibi contendas ostende-  
re , quæstionem hanc otiosam & ambiguam  
esse , ideoque neutram in partem debuisse  
determinari à Concilio . At si otiosa , cur  
Caluinus , Melanchthon , alijque refor-  
matores alteram partem contra SS. Patres  
& Ecclesiam catholicam post Luciferianos  
& Donatistas resuscitarunt , & tam pertina-  
citer nunc etiam urgunt ? Illud vehemen-  
ter miratus sum , quod sententiæ tuæ pa-  
tronum ipsum Augustinum alibi produce-  
re non verearis , quo nemo acrius catho-  
licum dogma aduersus sui temporis hære-  
ses propugnauit ; vt solus Tridentinæ defi-  
nitioni tuendæ abunde sufficiat . Sed mihi  
professionis meæ rationem reddere pro-  
positum est , vt non temere me antiquita-  
tem

tem contra nouitates, vniuersitatem contra priuatas opinones secutum ostendam; non ut contentionis ferram cum quoquam reciprocem.

Cæterum hisce tanquam leuioribus, & vt cumque ferendis multo iam grauiora & plane intoleranda subiungis: quæ non solum aures Batauas siue Saxonicas, sed etiam Græcas offendant. Ea sunt, Primitus supra reliquam omnem Ecclesiam Pontifici Romano iure diuino assertus; adeoque infallibilis Spiritus sancti assistentia eidem, ut toti familiæ Christi prefecto, & ecclesiæ sub Christo Domino capiti supremo, in rebus fidei totius Ecclesiæ consilio ac nomine definiendis, attributa. cui adiungis mutilationem Eucharistiæ, siue communionē sub vna specie, & missam sine communicantibus; quam Lutherus angularem vocat, ipsique diabolo adeo absurdam & impiam visam asserit, ut nocturno congresu validissime eam oppugnarit, & abrogandam esse Luthero planissime persuaserit. neq; alia solemnis Liturgiæ vna cum priuata tollendæ ratio illi fuit. Quocirca quid eiusmodi magistri auspicijs atque auctoritate Lutherani & Caluiniani reijciant, non magnopere mihi curādum existimo: dummodo id cum primitiæ ecclesiæ vniuersali

D

sensu & praxi conueniat; quod in hisce non minus quam præcedentibus articulis liquido ostendi potest.

Nam Romanæ ecclesiæ primatum Græci ante Imperij diuisionem, & postea florente Orientis Imperio, diu ante schisma & se-cutam inde Turcicam seruitutem, agnouerunt. Irenæus Græcus scriptor potentiorum illam principalitatem Ecclesiæ Romane, ad quam, ait, necesse est omnem conuenire ecclesiam, hoc est, eos qui sunt vndique fideles, non ab humano priuilegio, sed à fundatione & traditione Apostolica accersit. Nicæni Patres cum ad Romani episcopi exemplum Patriarchalibus ecclesijs prærogatiwas suas can. 6. cōfirmant, non iuris humani priuilegium, sed antiquos mores, & veterem, hoc est, apostolicam traditionem obtendunt. Eundem primatum confitentur Patres synodi Constantinopolitanæ can. 3. vbi regię urbis Episcopo secundum honoris locum decernunt. In Ephesini Concilij actis Cyrillus Alexandrinus de Nestorij hæresi recens tum exorta ad Cœlestinum PP. refert, longa Ecclesiærum consuetudine persuasus, ut ipse testatur. Eadem sedis Romanæ authentiam, hoc est supremam & liberam pro arbitrio agendi auctoritatem, & loci sui vicariam

potestatem confedit Cælestinus; ut sententiam, qua Nestorium circumscriperat, eo efficacius potentiusque exequatur. Vnde nam illa authentia sedis Romanæ, ab humano, an diuino Iure? Certe si S. Prosperrum audijamus con. collat. cap. 41. Cælestinus Cyriolo ad execandam Nestorianam impietatem Apostolico auxiliatus est gladio. In eodem Concilio parte 2. act. 2. Philippus presbyter gratulatur synodo, quod lectis Cælestini literis sancta membra sancto capiti se exhibuerint. Caput autem totius fidei, inquit, & Apostolorum est B. Petrus. Vides puto dignitatem capitis, siue primatum ecclesiæ Romanæ B. Petro Apostolo, hoc est iure diuino, nisi. idque luculentis verbis mox idem Philippus copiosius declarans ait: Nulli dubium, immo seculis omnibus notum est, quod sanctus beatissimus que Petrus, Apostolorum caput & princeps, fideique columna, & Ecclesiæ Catholicæ fundamentum, à Domino nostro Iesù Christo saluatore humani generis ac redemptore claves regni accepit, soluendique ac ligandi peccata potestas ipsi data est: qui ad hoc usque tempus, & semper in suis successoribus viuit, & iudicium exercet. Huius itaque secundum ordinem successor & locum tenens sanctus beatissimusque Papa.

D 2

noster Cælestinus episcopus, nos ipsius presentiam supplentes ad hanc sanctam synodum misit. Hæc in actis Ephesini Concilij. Verum quæ nulli tum dubia, sed sœculis omnibus nota, nostro tamen tempore ut dubia, & antiquitati incognita, vel primo loco inter absurdas Romanæ ecclesiæ assertiones ponis, tractatu tuo contra Moguntinos §. 142. Dic bona fide, mi Calixte, cui tutius credam, tibi neganti, an affirmanti Concilio? Accedit quod Iuuenalis Hierosolymitanus ibidem act. 4. affirmat, mortem fuisse inde ab ipsis deriuatum traditumque Apostolis, ut sedes Antiochenæ à Romana dirigatur, & apud eam iudicetur. Vnde act. quinta sancta Synodus ultimam de Ioanne Antiocheno sententiam Cælestini iudicio reseruat. Tunc Apostolicam illam ἀκολεψίαν καὶ ἀπόδοσιν ad umanum vel diuinum ius, hoc est, ad Petri primatum referendum existimas? Chalcedonensis synodi acta eundem primatum Ecclesiæ Romanæ, in Petrum Apolorum principem collatum, innumeris propemodum locis confirmant. Omitto quæ in præliminaribus epistolis Imperatorum & Augustarum habentur; quod priuata vel domestica testimonia ex Occidente prolata possint videri; ea scilicet quæ epi-

stola 15. 25. 26. & 33. leguntur. Sane actio-  
ne 1. Beatissimus & apostolicus episcopus  
vrbis Romæ omnium ecclesiarum caput  
vocatur, quia nimis sedem apostolicam  
gubernat. Act. 3. Diocorus episcopatu-  
m priuatur à Leone PP. per legatos & san-  
ctam synodum, idq; ope beatissimi & glorio-  
sissimi Petri Apostoli, qui est petra, & cre-  
rido Ecclesiæ catholicæ, & rectæ fidei fun-  
damentum. Depositionis causam præci-  
puam non semel adducunt Patres, quod  
contra ipsam sedem apostolicam latrarit,  
& in sanctum Leonem excommunicationem  
promulgare conatus sit; hoc est, contra ip-  
sum illum, cui vineç custodia à Saluatore  
comissa est; vt habet totius synodi re-  
latio ad Leonem: quem vocis B. Petri in-  
terpretem omnibus constitutum, concilio  
vt caput membris præfuisse aiunt. Et  
quamvis act. 16. ex Constantinopolitani  
concilij decreto, secundum dignitatis lo-  
cum Regiæ vrbis episcopo confirmant, ni-  
hilominus primatum & eximum ac præci-  
puum honorem Romanæ sedi conseruant:  
quod in eadem relatione Patres ita expli-  
cant, vt apostolici splendoris radio, quo  
Roma fulgebat, ecclesiam Constantinopo-  
litanam illustari, eiusque bonorum parti-  
cipatione ditari petant. Vides vir optime,

D 3

quid de primatus Romani origine ac fun-  
damento Orientalis ecclesia primis quin-  
que seculis crediderit, priusquam mabi-  
tionis vertigine in schismatis barathrum  
præceps ageretur. Nam post inuasam to-  
tius Illyrici, tum etiam Siciliæ & Calabriæ  
iurisdictionem ecclesiasticam, Constanti-  
nopolitanum Patriarcham sedi Apostolicæ  
non solum æquate, sed etiam præferre co-  
nati sunt, Nilus, Barlaamus, alijque schis-  
matici, non solum liuore, sed etiam impe-  
ritia, & veteris ecclesiæ disciplina ignoran-  
tione excœcati. Quotiescumque tamen ve-  
ritatis & vnitatis amor Græcorum animos  
subiit, eadē cum orthodoxa antiquitate  
sententiam professi sunt. Vnde in Synodo  
Florentina sess. 25. cum Latini primatum  
Pontificis sacræ scripturæ definitioni dictis-  
que sanctorum inniti scripsissent; Græci, vt  
suis quoque patriarchalibus priuilegijs con-  
sulerent, addi voluerunt; Papam sua pri-  
uilegia habere iuxta canones, & dicta san-  
ctorum, sacramque scripturam, & acta con-  
ciliarum. Vnde mox in decreto ynionis  
primatus pontificis iure diuino asseritur:  
quippe cui in B. Petro pascendi, regendi, &  
gubernandi vniuersalem ecclesiam à Chri-  
sto Iesu Domino nostro plena potestas  
tradita sit. Hęc Græca ecclesia ex maioruni

fiorum & totius antiquitatis sensu ; quæ  
hoc loco pluribus a me afferi necessum  
non est.

Nec magis Gr̄eos offendere potest Com-  
munio sub vna specie , quam ipsi æque ut  
Latini iam olim tenuerunt , atque etiam  
hodie passim retinent . Nam recens bapti-  
zatis infantibus de solo calice guttam in-  
stillant ; egrotis autem & moribundis sola  
panis specie viaticum exhibent : utrisque  
tamen verum & integrum Eucharistie sa-  
cramentum hoc modo se tradere non du-  
bitant . Idem ceteri omnes ad orientem &  
meridiem Christiani, pr̄sertim Abassini ,  
antiquo & perpetuo suę ecclesię more fa-  
ciunt . Neque Eucharistiam mutilari exi-  
stimauit antiquitas , cum fidelibus particu-  
las panis consecrati ad priuatam commu-  
nionem domum asportandas daret , vel ad  
anachoretas in eremū mitreret . Omnium  
vero clarissime utriusque ecclesiæ conser-  
sum perpetuum ostendit communio ex  
pr̄sanctificatis , qua Gr̄ci ferijs quadra-  
gesimalibus , Latini sola feria sexta maioris  
hebdomadę vtuntur , ex antiquissimo utri-  
que instituto : neque tum quidquam de sa-  
cramenti mutilatione suspicabantur .

Liturgiam sine communicantibus Gr̄-  
cis iuxta ac Latinis in usu nunc esse , docti-

sumi eius nationis viri, & ipse usus quem  
passim per Italiam cernere est, testantur;  
eoque falsam Chythrī criminacionem re-  
fellit Allatius, cuius librum apud Batauos  
editum, tibi iam visum lectumque non du-  
bito. Sed ne vocum ambiguitate fallamur  
dicam tibi, mi Calixte, quid hic tum in cete-  
ris Ecclesijs vrbicis, tum pr̄sertim in maio-  
ribus basilicis fieri obseruauerim; vbi festis  
diebus, hoc pr̄sertim anno, in tanta extero-  
rum frequentia, myriades hominum ad sa-  
cram communionem confluunt. Ibi summo  
mane Parochus, aut aliis sacerdos, ad desti-  
natum huic functioni altare dominici cor-  
poris sacramentum consecrat, ea particu-  
larum multitudine, quæ populo fidelium  
communicando eo die suffictura videa-  
tur. communicant tum de eiusdem sacer-  
dotis manu quotquot sacro officio adsunt:  
cateri qui & ipsi communicaturi toto de-  
inde antemeridiano tempore infinito pro-  
pemodum numero citius tardius templum  
accedunt, primum missę siue liturgiæ offi-  
cio adsunt, quod ob populi frequentiam  
& commoditatem à diuersis sacerdotibus  
ac diuersa altaria subinde celebratur: eo-  
que finito ad alterum illud altare, quod  
huic ministerio destinatum dixi, commu-  
nionem accipiunt. Tu ne sacerdotem illum-

sine communicantibus missam celebrasse; aut eos qui celebranti adfuere, cum sacerdote suo non communicasse affirmabis? non dicam communione precum & unitate Spiritus, sed ipsa participatione specierum sacramentalium; quamuis ad aliud altare de alterius sacerdotis manu eam acceperint? Puto te non dicturum; nisi unam ecclesiam, unum altare, unum sacrificium, unum sacerdotium; unam inter omnes fideles unius eiusdemque panis communionem, & unam unius corporis cum uno capite unionem negaueris. quam negare certe non potest, nisi qui factionum studio Christie ecclesiam plane ignoret. Tu vero, mi Calxte, numquid omnes qui olim sacræ Liturgiæ officio aderant, de Eucharistia, quæ per singulas synaxes celebrabatur, communicasse existimas? Neque hoc puto dixeris; qui antiquissimorum Patrum de communicantium infrequentia querelas non ignoras. Non laudans dico, sed ut necessitatis legem etiam tunc abfuisse ostendam.

Sed quoniam tu ea quæ in Catholicorum Liturgia minus probanda censes exposuisti; liceat mihi eadem libertate de novavestra vicissim ex te perquirere: qua pontificiæ missæ errores sublatos vos quidem

dicitis; nos omnem veteris Liturgię vel græcę vel latinę faciem abolitam eversam- que certo scimus. Non dicam de Caluinianis, Anabaptistis, Socinianis, quos præ- ter externos ritus ipsius quoque sacramen- ti veritatem sustulisse ingenue fateris: sed Lutheranorum missa, si tamen hoc nomi- ne appellanda, quid præter merum no- men apud vos habet? quamvis & hoc ferme intercederit. Synaxes illæ solemnes, quibus vno Ecclesiæ cum Christo capite per oblationem communionemque san-ctissimi corporis eius fouetur ac nutritur, ita olim omnibus communes erant, vt ijs non adesse piaculum duceretur grauissi- mum, & pœniæ supplicijque loco esset, si quis vel integrę actioni, vel parti præcipue interesse prohiberetur, quę Canonis nomi- ne nunc appellatur. Eo enim cum post orationes aliquot & lectiones sacras, ea- rumque explicationes peruentum esset, præter catechumenos & energumenos, etiam pœnitentes sanctuario excludeban- tur. Tota hæc actio apud vos in concio- nem seu δημογραφια mutata est: huius de- inde dimissa concione appendicula que- dam est qualiscunque illa missa, seu com- munionis formula, veteris Liturgię in lo- cum subintroducta; quam ceteri ea die

non communicaturi parum aut nihil ad se pertinere putant. Ita nunc Concio caput est Synaxeos, cuius pars ex veteri ecclesiæ instituto & preparatio esse solebat.

Sed profecto ut te Missa catholica sine communicantibus offendit, ita mihi multo magis communio vestra sine Missa displiceret. Quod enim missæ vestigium in vestra illa actione, præter exterria quedam, veste dico, & vasa, & nonnulla inania catholicæ Liturgie imitamenta? Quomodo enim missa sine oblatione? quomodo oblatione sine sacerdote? quomodo sacerdos sine ordinatione episcopi? quomodo episcopus sine legitima & apostolica successione? vel quomodo verum sacramentum corporis Christi, extra Christi ecclesiam? Manifestum enim est, ut ait S. Cyprianus, apud omnes hereticos Spiritus sancti gratiam non esse, nec eorum sacrificia, quamdiu heretici sunt, posse Deo placere: neque spiritualis gratiæ sanctificatione sacrificijs eorum tribui, qui offerunt ab ecclesiastici corporis unitate disiundi. Solius enim Ecclesiæ Deus delectatur sacrificijs, quam sacrificiū Deo facit unitas spiritualis: ubi & fidei veritas nullā credit in Trinitate distantiam, & pacis tenacitas fraternalm seruat in caritate concordiam. Attende tibi, ait lex Deutero-

nom. xii. ne offeras holocausta tua in omni loco quemcunque videris; sed in loco quem elegerit Dominus in vna tribuum tuarum. Audi, quis sit locus electus, ait S. Augustinus Rogatiano Donatistæ, & quæ tribus Domini. In psalm. 131. habes: quoniam elegit Dominus Sion, elegit eam in habitationem sibi. Hic est locus electus, hic mons sanctificatus, hæc ciuitas supra montem posita, ut abscondi non possit, hæc radix catholica, hæc vitis fructifera longe lateque diffusa: & ego, inquit, dico tibi: Attende tibi ne offeras in omni loco, id est, in omni heresi, & dicas; & hic Deus & ibi Deus est. Qui alibi præter Ecclesiam colligit, ait Cyprianus, Christi Ecclesiam spargit. vnica enim sponsa Christi vnam sponsi domum nouit, vnius cubiculi castitatem casto pudore custodit. Stare tu & viuere putas posse de ecclesia recedentem? sedes sibi alias & diuersa domicilia condentem? Sacramentum Paschæ nihil aliud in Exodi lege continer, vt agnus qui in figura Christi occiditur, in domo una edatur. Caro Christi & sanctum Domini ejici foras non potest: nec alia vlla credentibus præter vnam ecclesiam domus est. Vna autem ecclesia, vna & intus esse & foris non potest. Qui enim de ecclesia exie-

runt, certe in ecclesia non sunt, ideoque quæcunq; extra ecclesiam tenentur & sacramenta, & scripturæ ad speciem tenentur, non ad salutem: cum ista in sola eccl. e-sia catholica salubriter habeantur, vbi si des cum caritate retinetur. Extra hoc corpus, inquit S. Augustinus, neminem viuiscat Spiritus sanctus, per quem caritas Dei diffunditur in cordibus nostris. neque enim particeps est diuinæ caritatis, qui hostis est unitatis.

Tu vero optimenost, quæ unitas sit apud eos qui ab ecclesia catholica recesserunt: vbi ut omnes à catholicis, ita à seipsis singuli ferali odio dissident. Etenim ut Sampsonis vulpeculæ caudis colligatae Capite in diuersa tendebant, ita illi solo catholicæ veritatis odio coniuncti cætera omnia toto cælo differunt. Quinimo sola unitonis conciliandæ mentio, pacisque studium omnium odio in se concitando sufficit. Hic te ipsum tibi propono, qui non meminisse non potes, quomodo Turonensi colloquio Augustani tui ad Calvinianos te reiecerint, tum vero nuperi librorum indices ostendunt, quam non fraterne ijdem congregales tui scriptis non uno loco prouulgatis te exagitent. Ita dum nescio quod ecclesiæ simulacrum ex omni sectarum-

schismatumque genere , tanquam Baby-  
lonici colossi pedes ex ferro , testa , luto-  
que conflare conari , illi ipsi qui conglu-  
tinari nec possunt nec volunt , te oleum  
operamque perdentem cōuicijs contume-  
lijsque traducunt : adeoque dum omnium  
esse cupis , nullius es ; & ecclesia , cuius  
**ideam tibi singis** , spatio ferme imaginario  
coarctatur . Quid enim magis dissonum ab  
ipso fidei symbolo : quid religionis Christia-  
næ principijs magis aduersum dici aut co-  
gitari potest , quam vt priorem Ecclesiam  
ad Holsatiæ nostræ angulum , & vnam at-  
que alteram Ducatus Brunsuicensis prefe-  
cturam restringere quis velit ? cæteras or-  
bis prouincias erroribus & superstitioni-  
bus oppressas ad veritatis lumen caligare  
existimet ?

Agnosco sane Academiam vestram sin-  
gulari quodam Dei beneficio , & sapien-  
tissimorum Principum cura , viris eruditis  
& accurata docendi ratione ceteris per Se-  
ptentrionem scholis palmam præripere ;  
helluationes & morum corruptelam , bo-  
na mentis pestem , obnoxie auersari ; tum  
quod præcipuum duco , maiorem sacrę an-  
tiquitatis cognitionem ad fidei contro-  
uersias disceptandas adhibere : toto ta-  
men celo abest , vt Catholicæ ecclesiæ ad

Inuidiam obduci possit. immo quantis-  
cumque doctrinæ præsidijs feliciter instru-  
cta, hoc yno est infelix, quod catholica  
non est; dum Lutheri partem sequuntur,  
scissuras contra vniuersi orbis vnitatem fo-  
uendas suscepit.

Extrema malorum sunt hæresis & schis-  
ma, vnde præsens fidei iactura & irrevitabile  
salutis naufragium sequitur. ab hac peste  
nemo vñquam pius, nemo sapiens vitiatæ  
disciplinæ & corruptis ecclesiæ moribus re-  
medium quæsiuit. Ipsa enim separatio im-  
pios ostendit, vt ait Fulgentius, quæ tales  
ecclesiastico corpori non socios, sed aduer-  
farios facit. Neque enim à conuentu ec-  
clesiastice vnitatis corpore separaretur & lo-  
co, nisi prius ab ecclesiastica fide discede-  
derent corde corrupto. Habet quidem  
ager Dominicus præter boni seminis fru-  
gem etiam zizania, eaque proh dolor, co-  
piose ab inimico homine super seminata.  
verum non ideo segetem proteri aut exu-  
ri iubet pater familias; sed zizania cum  
ipsa fruge ad messem usque tolerat. Area  
hæc Domini ventilabro permundanda pa-  
leas frumento mixtas usque in finem sæcu-  
li sustinere non recusat. Exurentur suo tem-  
pore zizaniorum fasciculi sine messis detri-  
mento: illæ so tritico paleæ dispergentur.

Neminem intra Ecclesiam catholicam re-  
ete credentem, & bene viuentem aliena  
peccata maculant. Animæ ac saluti suæ  
iniurius est, qui palearum odio aream de-  
serit; cum frumentum non nisi ex area  
congregetur in horreum.

Nec despicienda est Christi sponsa, quod  
diurno peregrinationis æstu fusca; quod  
decolorata longæ serenitatis sole; quod  
etiam seculari puluere aspersa nunc videa-  
tur. nigra quidem illa, sed formosa: cuius  
gloria omnis interna cum sit, æmulorum  
oculos, in neuos rugasque cutis externæ  
tantum intentos fallit.

Sed bene est, quod inanis illa & fictitia  
ecclesiæ larua, quam sectarum auctores ma-  
gna puritatis specie venditant, nullis fu-  
corum pigmentis hactenus ita incrustari  
potuit, quominus suam prodat deformi-  
tatem: quippe cui nihil solidæ pietatis &  
sanctimoniae subesse statim deprehendit,  
qui paulo penitus introspicit. Nam quod  
tu seueritatem disciplinæ ecclesiasticæ fra-  
trum Bohemicorum exemplo reduci de-  
sideras, ea vetus querela est, & inane vo-  
rum, à Melanchthonে ante annos CXV  
conceptum, vagiente adhuc in cunis Lu-  
theranismo: quem si senescentem nunc  
adulta confirmataq; licentia ad obedien-  
tiæ

ix iugum retrahi posse existimas, fane falleris. Exutere iugum, non mutare voluit; omnemque conscientiae coercendae rationem carnificinam arbitratur. Cur enim non de veteri pœnitentium disciplina potius restituenda cogitas? cur non vita religiosa, & consiliorum euangelicorum observationem in usum reuocare studies? Sed ita fit; filius ille adolescentior cum domum mensamque paternam reliquisset, dissipata substantia peregre ad porcorum filias se proiecit. Ita post concubatas exustas à Luthero Canonum leges, Patrumque regulas, post proscriptos episcopos, post cuersa sanctioris vitae asceteria, monitores correctoresque Bohemicos desideratis: quasi tam altum profanatae religionis vlcus tali cataplasmate persanari possit.

Ego vero, mi Calixte, multo opportuniorem medendi modum tibi patriaque nostrae proponerem, sisani consilijs locus relinqueretur; maiorque veritatis pietatisque restaurandæ, quam factionum propugnandarum cura & solicitude esset: cogitarentque Principes, quæ mala in Rempublicam, quæ vitia & corruptela in mores vitamque priuatam, ex religio-

E

nis subuersione profluxerint: quam timendi sint ipsis hypocritæ, & fanatici homines, qui defecatissimam religionis puritatem professi, diuinæ humanasque leges promiscua facilitate proculcant; & sceleribus atque parricidijs eo grassantur, ne à quoquam dependeat, vel coerceri possit effrenis quiduis agendi licentia. Merito Ecclesia catholica mater Christianorum verissima, inquit Augustinus, non solum ipsum Deum, cuius adeptio vita est beatissima, purissime atque castissime colendum predicas; sed etiam proximi dilectionem atq; caritatem ita complectaris, ut variorum morborum quibus pro peccatis suis animæ ægrotant, omnis apud te medicina prepolleat. Tu cum ætates gradusque omnes officijs suis instruas, doces etiam Reges proficere populis, mones populos se subdere regibus; quibus honor debeatur, quibus affectus; quibus reuerentia, quibus timor, quibus consolatio, quibus admonitio, quibus cohortatio, quibus disciplina, quibus obiurgatio, quibus supplicium, sedulo dôces; ostendens quemadmodum & omnibus omnia, & omnibus caritas, & nulli debeatur iniuria. Deinde vitæ spiritualis magistram candem prolixe cele-

brans, addit præclare: Quod vtinam isti  
hæretici (ecclesiæ scilicet catholicæ con-  
temptores) intelligere si valerent, nuf-  
quam profecto Deum nisi apud te, atque  
in tuo gremio, minime superbi & bene-  
pacati venerarentur. Ad hanc tutius con-  
fugies, mi Calixte, quam ad fraternita-  
tem Bohemicam, si ecclesiæ doctrinam di-  
sciplinamque apud nostros restitutam cu-  
pias.

Ad hunc salutis portum te inuitare non  
desinam, ad quem sedulo peruestigandum  
tua in primis opera me excitatum profi-  
teor. Nam Romanam ecclesiam, vnam  
illam, sanctam, catholicam, & apostolicam  
esse non tam facile mihi licuisset perspice-  
re, nisi antea tuo ductu certo credidis-  
sem, eam non Antichristi sedem, & Baby-  
lonicæ meretricis lupanar, sed vere eccle-  
siam etiam nunc esse, & salutis spem pie in  
ea viuentibus neutiquam denegandam;  
eo quod precipua fidei capita, quibus fun-  
damenti instar salus nostra innititur, salua  
& immota retineat. De reliquis, si absque  
partium studio esset, vunionem aliquam-  
vel saltem syncretismum iniri posse existi-  
mabas. Ad hæc multa temerario illo re-  
formationis tumultu abrogata dolebas,

quæ cum magno pietatis emolumento potuissent retineri. multa quoque Ecclesiæ catholicæ falsa, & absurdâ fatebaris affingi, quæ aut plane ignoret, aut ipsa improbet. Ita tu Hermæ vialis instar in biuio defixus, digito intento viam qua ad ecclesiam catholicam pergerem mihi subindicasti.

Quod autem à sententia, quam maturo consilio post longas atque ardentissimas preces amplexus sum, tuo colloquio me dimoueri posse existimas, id vero fiet, ubi aliam scripturam, alia Conciliorum acta, aliam ecclesiasticam historiam, & diuersa Cypriani, Augustini, aliorumque Patrum scripta, ab ijs quæ certa & indubitate Romæ consului, mihi exhibueris. Nam elusiones, & subterfugia Spalatensis, & similiū mangonum, in tam perspicua antiquitatis sententia admittere non possum.

Interim te, mi Calixte, per Deum & Christum salutis nostræ auctorem oro atq; obsecro, ut animæ tuæ negotium tibi commendatissimum habeas; serioque cogites de ecclesia Dei, columna & firmamento veritatis, qualem eam ab Apostolis, virisque apostolicis fundatam, totoque orbe diffusam, prima quinque secula viderint:

quibus illa fidei dogmatibus, quibus sacramentis, qua disciplina, quo regiminis modo tunc fuerit instructa; quanto studio puritatem & unitatem suam aduersus heres & schismata vindicarit. Eius statum faciemque ubi diligenter inspexeris, tum sine odio studioque partium dispice, quam omnia illa nunc salua supersint in Romana, ceterisque cum Romana communicantibus ecclesijs; eamque & nominis & dogmatis catholici haeredem, atque apostolici depositicustodem agnosce. Contra perpende, quam truculenter & impie in matris viscera sequierint infausti illi reformatores; ut faciem eius deturpauerint, artus dilaniarint: ut pro veteri catholica doctrina suos quique substituerint errores & deliria: ut sacram scripturam non secundum perpetuum & uniuersalem sensum & consensum SS. Patrum explicit, sed ex cerebri sui libidine nouis & priuatis interpretationibus peruertant: ut sacramenta eorumque ritus abrogarint; Apostolicas traditiones, omnemque veterem disciplinam, Patrum & conciliorum saluberrimis constitutionibus firmatam, sustulerint, vel eneruarint; consilia euangelica & vita sanctioris studia exploserint; his-

rarchiam ecclesiasticam , & omnem præcipiendi & parendi distinctionem confunderint . Sublata Episcoporum auctoritas , nudo tantum nomine ad ditiones redditusque ecclesiarum occupandos nonnupiam seruato . Ordines presbyterorum , & diaconorum , ceterique officiorum & ministeriorum gradus abrogati : denique noua ecclesiæ facies introducta omniibus seculis ignota ; ad cuius conspectum quotquot inde ab Apostolis fuere doctores , Patres , episcopi , virique sancti , velut ad monstrum & errorum lernam nunc cohoretcerent .

Et quoniam te virum doctum , & antiquitatis sacræ vnum fere præ cæteris studiosum compello , cogita quanta Septentrioni nostro ex infelici illa religionis subversione ignorantiae cæcitas incubuerit . Patrum , & ecclesiæ doctorum non scripta tantum sed nomina ipsa ignota non solum vulgo , sed ijs qui in ecclesijs scholisque docendi munus sustinent . Si quæ forte cuiquam nota aut lecta , ex rhapsodis & ecclesiæ perduellibus ea tantum confarcinantur loca , quæ ad veritatem oppugnandam ut cumque facere videntur . Scis quali librorum supelleatile mi-

nistri & prædicantes apud nos instruti  
ex quibus postillarum lacunis illi pasto-  
res doctrinæ pabulum crudum indige-  
stumque gregi suo proponant. Contra-  
si publicas priuatasque bibliothecas hic  
inspicias, si studia cordatorum hominum  
expendas, statim vides, quam omnia ad  
primitiū ecclesiæ mentem doctrinamque  
intelligendam explicandamque tendant.  
Libri & monumenta antiqua, presertim  
sacra, summo studio & impensis maximis  
vndique parantur; & in ijsdem publica lu-  
ce donandis doctorum hominum desu-  
dat industria. Ita nuper Gr̄ecorum Patrum  
in Prophetas commentarijs, alijsque in-  
vetus Testamentum quas vocant catenis  
non uno volumine comprehensis, immo-  
rientem vidi optimum doctissimumque  
Corderium, alios concilijs antiquis & SS.  
Patrum operibus ab interitu vindicandis;  
alios historiæ ecclesiasticæ annalibus pro-  
cudendis occupatos noui. & ne quid in te-  
nebris lateat, quo fides catholica illustrari  
possit, sunt qui veterum Christianorum  
cœmeteria cryptasque martyrum ingenti  
Romæ subterraneæ opere descriptas in-  
lucem edant. Ita unus omnibus antiqui-  
tatis retinendæ amor, nouitatis auersatio.

Eadem mihi nouæ sectæ deferendæ, eadem  
antiquæ fidei amplectendæ causa. ad quam  
te & Vossium nostrum iterum atque ite-  
rum inuito, certissimo æternæ salutis lucro,  
quod extra Catholicam Ecclesiam frustra  
speratis. Hoc tandem, mi Calixte, rogo,  
quod ille in simili caussa apud S. Augusti-  
num; si institutum & exemplum meum  
piget imitari, noli aduersari. Vale. Ro-  
mæ, Anno Iubilei M D C L Kal. Septemb.

## EPISTOLA GEORGII CALIXTI

Ad Christophorum Ranzouium

*Salutem ab auctore salutis.*

ENEROSE Vir, domine &  
amicæ longe carissime, quoties  
huc venerunt, qui ex Italia  
redirent, toties de te sciscita-  
tus sum. Fecit enim tuum pietatis, vir-  
tutis, & eruditionis studium, cuius hic  
luculenta specimina edidisti, vt te in-  
oculis geram, & de incolumitate tua so-  
licitus sim; certa spe nixus, te commu-  
ni nostræ patriæ magno ornamento insi-

gnique emolumento breui fore . Ut au-  
tem fieri solet , alij de te nihil referre  
poterant , alij nunciabant te Romæ de-  
gere , & familiaritatem contraxisse cum  
Henrico Iulio Blumio , nostræ olim disci-  
plinæ alumno . Cuius rei certiores nos  
faciebat haud ita pridem Franciscus Hen-  
ricus VVitzendorpius , patritius Lune-  
burgensis , nisi mihi memoria imponit , cuī  
iam senescens , quod talia attinet , non  
semper possum fidere . Sed nuper etiam  
non nemo hac transiuit , qui me quidem  
alloquutus non fuit , nec mihi innotuit ,  
sed alijs narravit , te admodum familiarem  
factum Lucæ Holstenio , & nonnullis Ie-  
suitis , qui multoties tibi scrupulos inij-  
cerent , & dubia mouerent , vt propemo-  
dum inciperes vacillare , & religionem  
pontificiam reformatæ anteferre . Venit  
idipsum ad aures nostri Vossii , eiusque  
animum vehementer perculit , vt ad me  
quoque deferret . Commouebare equidem  
fateor , aliquantulum : sed cum me recol-  
ligerem , & prudentiam vimque ingenij tuū  
expenderem , & Vossum bono animo esse  
iussi , & ipse fui ; non ignarus , quanta illa  
tibi diuinitus concessa , & quam frequen-  
ter fallant , & plane infidi nuncij sint rumo-

res. Non potes ignorare, inter omnes partes, in quas hodie, proh dolor, scinditur populus Christianus, Pontificiam plurimis superstitionibus, corruptelis, figuramentis, & nouitatibus scatere: inter quas etiam est, qui hodie celebratur Iubileus, antea apud Christianos inauditus, & demum ante annos CCCL à Bonifacio IIIX. homine improbo institutus. Quamquam hoc malorum minimum videri possit, si cum di<sup>t</sup>atibus Hildebrandicis aliquanto antiquioribus comparetur. Qui Pontificijs se iungit, cogitur, se separare ab omnibus alijs Christianis, qui sunt per totum orbem terrarum; & quidem ob caussas aliquando non admodum graues. Cogitur enim anathema illis dicere, qui Purgatorium non admittunt, qui septenarium numerum Sacramentorum in dubium vocant, qui baptismum Ioannis & Christi eundem fuisse non fatentur. Iam quod attinet primatum Pontificis de iure diuino, eiusque infallibilitatem, mutilationem Eucharistiæ, & Missam sine communicantibus, hæc talia sunt, vt à Christians Græcis, Lutheranis & Caluinianis, quemadmodum appellamus, reijciantur: licet ipsi propter eiusmodi reiectionēsue

improbationem à Pontificijs anathemate  
feriantur. Græca Ecclesia sicut sub iugo ty-  
rannico gemit, & dira seruitute premitur.  
ita paulatim ignorantia quadam oppri-  
mitur, & necessaria ad iudicium de doctri-  
nis controversis ferendum eruditione de-  
stituitur. Galuiniana hinc magnam ma-  
culam contrahit, quæ contra disertam  
Sernatoris assertionem corporis sanguinis-  
que Dominici in sancta Eucharistia presen-  
tiam inficiatur. Lutherana, quæ dogmati  
vbiquitatis inherescit, vix minorem, dum  
hunc satis crassum errorem tuetur & ob-  
trudit. Mi nobilissime Ranzoui, ausim affir-  
mare, vix alibi ecclesiam inueniri melius  
comparatam, quam in nostra patria, & hic  
in Ducatu Brunsuicensi, ditionis VVulfe-  
butenlicæ & Calemburgicæ. Exulant enim  
inde non modo superstitiones & corrupte-  
læ pontificiæ, sed etiam Caluinismus, qui  
presentiam in Eucharistia negat, & illau-  
dabile dogma vbiquitatis. Contra insci-  
tiam quoque in Academia pugnamus,  
quantum possumus, & optimæ eruditio-  
nis studia alias fugientia retinere cupimus  
& stabilire. Scis etiam pro pietatis & san-  
ctimoniac studio nos satagere, & quod do-  
ceamus absque eo gratiam Dei, & salu-

tem firmam, & indubitatem subsistere non posse. Superamur tamen fateor, quod severitatem disciplinæ ecclesiasticæ ad pietatem omnino facientis attinet, à Fratribus Boemicæ confessionis. Cæterum tuo consilio & prudentia & auctoritate in patria nostra, quæ adhuc desiderari possint, aut emendari postulent, aliquando suppletum, & correctum iri spem omnino certam concepi. Qua ne fruster, faxit Deus Optimus Maximus, tibique inspiret, quæ huc faciant, & ad illustrandam diuinam gloriam, & promouenda patriæ ecclesiæ reique publicæ emolumenta. Si quis autem scrupulus iniectus, ei quæso locum concedere noli. & si forte remouere totum nondum possis, ita suum iter institue ut in reditu nos inuisas: nullus enim dubito, per auxilium diuinum, & mutuam nostram collationem facile sublatum iri. Bene vale & age feliciter nostri memor, quemadmodum nos tui. Ex Academia Iulia. VI. Maij. C I C I D C L.

Generositati tuae addictissimus

GEORGIVS CALIXTVS









*Locanus*

1. 2. 3.

Q. C. 11

Th  
5811